

ԺԵՄԵՐՈՆԵՅԱ ՄԱՅՐԱՎՈՐՈՒՄ

ՄԱՅՐ ԱԹՈՒ ՍՈՒՐԲ ԷԶՍԻԱԾՆԻ
ԿՐՈՆԱԿԱՆ, ՄՇԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ

Ծաղկազարդի տոնը Մայր Աթոռ Սուրբ Էջմիածնում

Մարտի 29-ին Հայաստանյայց Առաքելական Սուրբ Եկեղեցին տոնախմբեց մեր Տեր Հիսուս Քրիստոսի՝ Երուսաղեմ հաղթական մուտքի հիշատակը՝ Ծաղկազարդի տոնը, որը Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի օրհնությամբ հռչակվել է Մանուկների օրհնության օր:

Այս առիթով Առավոտյան ժամերգությունից հետո, հանդիսապետությամբ Ամենայն Հայոց Կաթողիկոսի, Մայր Աթոռ Սուրբ Էջմիածնի մոմավառության արքեպարահուն տեղի ունեցավ Անդաստանի արարողություն և մանուկների օրհնության կարգ:

Նորին Սրբությունն իր օրհնությունը բաշխեց Մայր Աթոռում համախառն բազում մանուկների՝ նրանց ընծայելով խաչեր, իսկ հավատավոր ժողովրդին բաշխվեցին Անդաստանի ընթացքում օրհնված ուռնու ճյուղերը:

Բերկրառատ տոնի կապակցությամբ Միաձուլված Մայր Տաճարում, հանդիսապետությամբ Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի, մատուցվեց Սուրբ և Ամենաի Պատարագ: Պատարագին էր Մայր Աթոռի Քարոզչական կենտրոնի տնօրեն Հոգեշնորհ Տ. Չաքարիա Ծայրագույն վարդապետ Բաղդույանը:

Հայր Սուրբը, իր քարոզում անդրադարձնալով օրվա խորհրդին, ի մասնավորի



նշեց. «Հիսուս Երուսաղեմ մտավ ոչ թե փառաբանվելու, այլ չարչարվելու և խաչվելու մարդկության փրկության համար: Այսօր Տիրոջ փառաբանողները վաղը Պիղատոսից պահանջելու են խաչել Նրան: Այս լուսավոր տոնը ինքնատիպ հավատի փորձություն է,

երբ կարևոր են ոչ միայն օրհնաբանելն ու փառաբանելը, այլ նաև անպայմանավոր հավատարմությունն Աստծուն և մեր հայրերի թողած հոգեմտավոր հարուստ ժառանգությանը: Ուստի եկեք մեր սրտի դռները բացենք և թույլ տանք, որ Հիսուս մտնի



և թագավորի այնտեղ՝ առաջնորդելով դեպի հաղթանակ և երկնքի արքայություն:

Սուրբ Պատարագի ավարտին, Ամենայն Հայոց Հայրապետի նախագահությամբ, վերստին կատարվեց մանուկների օրհնության կարգ:



Ամենայն Հայոց Կաթողիկոսն ընդունեց Հնդկաստանում բուժումն ավարտած Արցախյան պատերազմի մասնակից Արտաշես Ամիրջանին

Մարտի 25-ին Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսը Մայր Աթոռ Սուրբ Էջմիածնում ընդունեց Արցախյան առաջին պատերազմի ընթացքում հաշմանդամություն ձեռք բերած Արտաշես Ամիրջանին, որ Նորին Սրբության հոգածությամբ մեկնել էր Հնդկաստան՝ ստանալու անհրաժեշտ բուժումն ու պրոթեզավորումը: Հանդիպման Արտաշես Ամիրջանի իր երախտագիտությունը հայտնեց Ամենայն Հայոց Կաթողիկոսին ցուցաբերած աջակցության համար՝ տեղեկացնելով բուժման արդյունավետ ընթացքի

և Հնդկաստանում խնամատար կեցության մասին:

Այնուհետև Նորին Սրբությունն իր օրհնությունը բերեց Արտաշես Ամիրջանին՝ գոհունակությամբ արձանագրելով, որ բուժական այս խնամքով կբարելավվի վերջինիս կենսագործունեությունը: Իր խոսքում Վեհափառ Հայրապետն ընդգծեց, որ Մայր Աթոռ Սուրբ Էջմիածինը շարունակելու է անհրաժեշտ աջակցություն և մշտական հոգածություն ցուցաբերել համուն հայրենիքի պայքարում իրենց առողջությունը նվիրաբերած հայրերին՝ զորակցելով նրանց և նրանց ընտանիքներին:

Ամենայն Հայոց Կաթողիկոսը Մայր Աթոռում ընդունեց հայորդյաց տների սաներին

Մարտի 29-ին՝ Ծաղկազարդի տոնի առիթով, Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսն ընդունեց Մայր Աթոռ Սուրբ Էջմիածնի և Հայկական բարեգործական ընդհանուր միության հովանու ներքո գործող հայորդյաց տների շուրջ 760 սաներին:

Հայորդյաց տների հոգևոր տեսուչ Հոգեշնորհ Տ. Հարություն վարդապետ Կիրակոսյանը սաների ամուսնից ուրախություն հայտնեց Ծաղկազարդի տոնի առիթով Մայր Աթոռ Սուրբ Էջմիածնի այցելելու և Հայոց Հայրապետի օրհնությունն ստանալու հնարավորության համար:

Իր օրհնությունն ու հայրական սերը փոխանցելով հայորդիներին՝ Նորին Սրբությունը գոհունակությամբ ընդգծեց, որ ի դեմս հայորդյաց տների՝ Հայ եկեղեցին իր կարևոր նպաստն է բերում մատաղ սերնդի կրթության և դաստիարակության գործին:

Վեհափառ Հայրապետն ուրախությամբ հաստատեց, որ հայորդյաց տներում ոչ միայն բացահայտվում ու զորանում են հայորդիների տաղանդներն ու շնորհները, այլ նաև կերտվում է նրանց նկարագիրը՝ խարսխված հոգևոր և ազգային արժեքների վրա: Այս առնչությամբ Ամենայն Հայոց Կաթողիկոսն արձա-



նագրեց, որ սաներն իրենց ձեռք բերած հմտություններն ու կարողությունները կծառայեն հայրենիքի առաջընթացին:

Հանդիպմանը Նորին Սրբությունն իր գնահատանքը հայտնեց հայորդյաց տների տնօրեն կազմին, մանկավարժներին և հայորդյաց տներում հոգևոր ծառայություն իրականացնող քահանա հայրերին իրենց նախանձախնդիր, ժրջան ու նվիրյալ աշխատանքի համար: Վերջում Հայոց Հովվապետը հայորդյաց տան սաներին ընծայեց Ընտանեկան Աստվածաշնչեր և խաչեր:

Հաղորդագրություն

Ն. Ս. Օ. Տ. Տ. Գարեգին Երկրորդ Ամենայն Հայոց Կաթողիկոսի՝ մարտ 16, 2026 թվակիր Հայրապետական տնօրինությամբ Վայոց ձորի թեմի առաջնորդ Գերաշնորհ Տ. Աբրահամ արքեպիսկոպոս Մկրտչյանը ազատ է կացուցվել թեմակալ առաջնորդի պաշ-

տոնից և կոչվել հանգստյան՝ իր գրավոր և բանավոր դիմումների հիման վրա: Հայրապետական տնօրինությամբ Սյունյաց թեմի առաջնորդ Գերաշնորհ Տ. Մակար եպիսկոպոս Հակոբյանը համատեղության կարգով նշանակվել է Վայոց ձորի թեմի առաջնորդական տեղապահ՝ իրականացնելու թեմակալ առաջնորդի պարտականությունները:

Ամենայն Հայոց Կաթողիկոսը ցավակցագիր է հղել Համայն Վրաստանի Կաթողիկոս-Պատրիարք Իլիա Բ-ի վախճանման առիթով

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսը հանուն Հայաստանյայց Առաքելական Սուրբ Եկեղեցու Գերագույն հոգևոր խորհրդի, Մայր Աթոռ Սուրբ Էջմիածնի միաբանության և հավատավոր ժողովրդի ցավակցագիր է հղել Համայն Վրաստանի Կաթողիկոս-Պատրիարք Նորին Սրբություն Իլիա Բ-ի վախճանման առիթով:

տական ծառայության ընթացքը վկայություն եղավ հավատքի ամրության ու հոգևոր նվիրյալ առաջնորդության: Նրա հովվապետությունը նշանավորվեց Վրաստանում հոգևոր կյանքի վերագործունեությունը, եկեղեցական կյանքի զորացմամբ և աշխուժացմամբ: Դժվարին ժամանակներում երջանակալիշատակ Պատրիարքը հայրական իմաստությամբ և սիրով առաջնորդեց իր հավատավոր հոտը՝ հաստատուն պահելով Վրաց Սուրբ Եկեղեցու առաքելությունը»,- ասված է Ամենայն Հայոց Կաթողիկոսի ցավակցագրում:

Վեհափառ Հայրապետն Ամենակալ Տիրոջ մխիթարությունն է հայցել Վրաց Ուղղափառ Եկեղեցու հոգևորականությանն ու վրաց սգակիր բարեկամ ժողովրդին՝ մաղթելով, որ Նորին Սրբության հիշատակը միշտ վառ մնա հավատավոր իր զավակների սրտերում և ներշնչման աղբյուր դառնա գալիք սերունդների համար:



Լրատվական նյութերը՝ Մայր Աթոռ Սուրբ Էջմիածնի տեղեկատվական համակարգի

Հավատացյալներն ինչու պիտի զգուշանան կարգալույծ արված կեղծ «հոգևորականից», և ինչու է նրա արածը սրբապղծություն

Նոգևոր վտանգից խուսափելու համար անհրաժեշտ է, որ մարդիկ իմանան կարգալույծ եղած նախկին հոգևորականի կեղծ քահանայագործման և նրա կեղծ ծիսակատարության մասին ողջ ճշմարտությունը, որպեսզի լինեն պաշտպանված:

1. Ըստ Հայ Եկեղեցու վարդապետության և կանոնների՝ կարգալույծ արվածը բոլորովին զրկվում է քահանայական կարգից, շնորհից, օծումից, ձևից և նշանից, այսինքն՝ նա դասվում է աշխարհականների շարքին:

2. Հայ Առաքելական Եկեղեցու տեսանկյունից՝ կարգալուծության դեպքում տեղի է ունենում ավելին, քան պարզապես իրավական սահմանափակումն է:

3. Կարգալույծի օծումը կամ դրա հետ կապված շնորհը դադարում է գործել, քանի որ քահանայական կարգը, շնորհը, օծումը, նշանը և ձևը փոխկապակցված են: Անհնազանդ հոգևորականը, եկեղեցական իշխանության կողմից զրկվելով կարգից, զրկվում է և դրանցից:

4. Կարգալույծը կորցնում է խորհուրդների շնորհների աղբյուրից՝ Աստուծուց, որը գործում է միայն Եկեղեցու Մարմնի միջոցով:

5. Կարգալույծի կողմից կատարված «խորհուրդի» միջոցով չի փոխանցվում Սուրբ Հոգու շնորհը, քանի որ նա այլևս քահանա չէ, Եկեղեցու նվիրապետությունից դուրս է գործում և հետևաբար՝ Աստծու կամքից դուրս:

6. Կարգալույծի կողմից ոչ մի եկեղեցական խորհուրդ չի իրագործվում, այսինքն՝ նրա կողմից կատարված ցանկացած ծես՝ «մկրտություն», «պատարագ», «պսակ», «ձեռնադրություն», մաս և «թաղման» և «բժշկություն» կարգերն անվավեր են, հոգևոր տեսանկյունից բովանդակազուրկ և անարգանք են Սուրբ խորհուրդի հանդեպ:

7. Կարգալույծի ձեռքով կատարված ցանկացած «արարողություն» հոգևոր տեսանկյունից ոչ միայն դատարկ է ու խորհրդագրված, այլև խիստ վտանգավոր:

8. Կարգալույծի ձեռնամբ ոչ մի «խորհուրդ» վավեր չէ թե՛ իրավական, թե՛ հոգևոր և թե՛ միստիկ տեսանկյունից:

9. Եթե կարգալույծ արվելուց հետո քահանան հանդգնի շարունակել ներկայանալ և գործել որպես քահանա, ապա ըստ կանոնի՝ նա ամբողջովին պետք է արտաքսվի Եկեղեցուց, իսկ նրանից մկրտվածներին ու պսակվածներին մարտադիր պետք է նորից մկրտել և նորից պսակել:

10. Մկրտությունը և պսակը զուտ վկայական տալ-չտալու հարց չեն: Կարգալույծի կատարածի մեջ, ծեսին հատուկ արտաքին տեսանելի գործողություններից բացի, որևէ աստվածային ծածուկ ամուսնանելի խորհուրդ չի կատարվում: Այսինքն՝ Սուրբ Հոգու ներգործությամբ կատարված մկրտության, պսակի իրական խորհուրդներ չեն, երկնքում ոչինչ չի արձանագրվում, «պատարագի» ընթացքում նշխարն ու գինին չեն վերափոխվում Տեր Հիսուս Քրիստոսի սրբարար ու կենարար Մարմնին ու Արյանը:

11. Կարգալույծ քահանայի պնդումը, թե իր օծումը մնում է և հիմք է հետագա քահանայագործման, կեղծ և անհիմն է: Այո, օծումն անկրկնելի է, սակայն կարգալույծի դեպքում այն լուծվում («կապվում») է և դառնում անգործունյա: Օծումը քահանայի սեփականությունը չէ, որ իր կամքով պահի, այլ տվողն է լուծում և դարձյալ վերականգնում,

եթե ապաշխարությամբ վերադառնում է իր՝ Մայր Եկեղեցու գիրկը: Քահանայական դրոշմը՝ որպես հնարավորություն, տեխնիկապես մնում է, և դա է պատճառը, որ ապաշխարող քահանային կրկնաձեռնադրություն չի արվում:

12. Քահանայական ձեռնադրության անջնջելիությունը բացառապես Կաթոլիկ Եկեղեցու ուսմունք է, որը հաստատվել է Տրիդենտյան ժողովում (1545–1563 թթ.) և գործադրումն է այդ ժողովի որոշումների: Այդ ժողովի որոշումները տարածվում են միմիայն ժողովը գումարած Եկեղեցու և այդ ժողովի որոշումներն ընդունողների վրա:

13. Նշյալ կաթոլիկ ժողովի տրամաբանությամբ ստացվում է, որ եպիսկոպոսը, ձեռնադրություն կատարելով, փոխանցում է ոչ թե եկեղեցական շնորհը, այլ իր անձնականը, և դրա համար էլ այնքան կարևոր չէ, թե քահանան իր Եկեղեցու հետ է, թե՛ հեռացել է նրանից: Ըստ այդմ՝ քահանան կարող է բաժանվել եկեղեցական իշխանությունից, արգելված լինել, կարող է բոլորովին հեռանալ քրիստոնեությունից, դառնալ, օրինակ, օկկոլտիստ կամ բացահայտ անաստված, բայց և այնպես մնալ քահանա՝ պահպանելով առաքելական ձեռնադրությունը:

14. Ըստ Ուղղափառ Եկեղեցու վարդապետության՝ կրկնամկրտություն կամ կրկնաձեռնադրություն չի կատարվում, քանի որ հակառակ դեպքում աստվածաբանական ընկալումով ընդունելի կլինեն, որ անձի անարժանության, պղծության պարագայում եղծվում է նաև նրան տրված աստվածային շնորհը, և այն պետք է կրկնել շնորհը շտկելու կամ սրբելու համար: Այդ պատճառով էլ ոչ թե քահանայության կամ մկրտության անջնջելիությունն է հաստատագրվում, այլ շեշտվում է աստվածային շնորհի անեղծանելի բնույթը:

15. Կարգալուծությունը միայն թղթի վրա գիր չէ, որը կարգալույծը կարող է չընդունել կամ անտեսել, այլ եկեղեցական իշխանության վճիռ, որով լուծվում են քահանայի տվյալ կանոնի գործունեությունը և ուժը՝ կտրելով այն Եկեղեցու կենարար միասնությունից:

16. Քահանայագործելու իրավունքը բխում է ձեռնադրության ժամանակ Աստուծուց ստացած շնորհներից: Սա գրասենյակային թուղթիության հարց չէ, աշխատանքային հարաբերություն չէ և հետևաբար՝ ենթակա չէ Եկեղեցուց դուրս որևէ աշխարհիկ կարգավորման:

17. Կարգալուծությամբ վերցվում է այդ իրավունքը, քանի որ իրավունք ծնող աղբյուրը՝ ձեռնադրությամբ ստացված շնորհը, տվողի կողմից հետ է վերցվում:

18. «Լուծում» բառը նկարագրում է կարգալույծ քահանայի շնորհի գործադրման լիակատար դադարեցում, որը ոչ միայն կանոնական պատիժ է, այլև հոգևոր հետևանք:

19. Կարգալույծի կողմից մատուցված «պատարագ», կատարված «մկրտություն», «պսակ» ոչ թե շնորհ են, իսկ «թաղման» կարգը՝ ոչ թե մխիթարություն և առ Աստված ողորմության աղերս, այլ մարդկանց հանդեպ խաբեություն և հայիյություն Սուրբ Հոգու դեմ:

20. Խաբեություն են նաև կարգալույծի կողմից խոստովանություն ընդունելը, մեղքերի թողություն տալն ու ապաշխարության կարգ նշանակելը: Դրանք նույնպես անվավեր են:

21. Կարգալույծն իրավունք չունի գտնվելու Եկեղեցու դատում, ավանդատներում, էլ չասած՝ խորան բարձրանալու և եկեղեցական պարագաներին՝ սկիհին, մասնատուփին, մեռնամանին, Ավետարանին ձեռքով դիպչելու: Նրա՝ որպես հոգևոր կոչում չունեցող անձի կողմից սրբազան վայրի՝ եկեղեցու, եկեղեցական սպասքի ապօրինի օգտագործումը, ծեսի պատրանքով աղոտոելը կանոնական հանցանք է և սրբապղծություն:

22. Կարգալույծն իրավունք չունի Ս. Հաղորդություն բաշխելու: Դա նույնպես սրբապղծություն է:

23. Կարգալույծն իրավունք չունի հոգևորականի զգեստ հագնելու, լանջախաչ կրելու և այլն: Դրանով նա միտումնավոր մոլորեցնում է մարդկանց:

24. Կարգալույծի քահանայագործելու նմանակումը (իմիտացիա) պարզապես վարչական սխալ կամ կարգապահական խախտում չէ, այլ հոգևոր կեղծիք, որը գայթակում է մարդկանց և նենգաբար հարվածում Եկեղեցու նվիրապետության հիմքերին: Արանք ծանրագույն մեղքեր են:

25. Կարգալույծները խաբում են պարզամիտ հավատացյալներին՝ նրանց մատուցելով «դատարկ բաժակ»: Նրանք չեն փոխանցում Աստծու օրհնությունը, այլ մոլորվածներին իրենց ըմբոստությանն մասնակից դարձնում:

26. Հիսուս Քրիստոս Սուրբ Հոգուն անվանեց «Ճշմարտության Հոգի» (Հովհ. 14:17): Իսկ կարգալույծը, զրկված լինելով քահանայական շնորհից, երբ ձևացնում է, թե «պատարագ» է մատուցում կամ «մկրտություն» անում, նա Աստծու անունով կեղծիք է մատուցում: Դա ոչ միայն կանոնական ապօրինություն է, այլև ծանրագույն մեղք՝ սրբապղծություն:

27. Ճշմարտության Հոգու Անունը ստի և խաբեության մեջ օգտագործելը նշանակում է ուղղակիորեն հակառակել այդ Հոգուն: Սա սրբապղծություն է, որովհետև կարգալույծը խաբեաբար Սուրբ Հոգու շնորհները սեփական անձին վերագրելու պատրանք է ստեղծում՝ մարդկանց մոլորեցնելու համար:

28. Եկեղեցական խորհուրդները (Մկրտություն, Պսակ, Ս. Հաղորդություն) կատարվում են Սուրբ Հոգու էջքով և ներգործությամբ: Բայց այդ շնորհը տրվում է Եկեղեցու միջոցով՝ առաքելական հաջորդականության մեջ, որից զրկվում են կարգալուծները:

29. Երբ մարդը կտրվում է առաքելական հաջորդականությունից (կարգալույծ է լինում), նրանից վերցվում է խորհուրդներ կատարելու իշխանությունը:

30. Շարունակելով խորհուրդներ և ծեսեր կատարել նա փորձում է «գողանալ» Աստծու շնորհը (ինչը, իհարկե, անհնար է) կամ նմանակել ու կապակել: Սա վկայում է այն մասին, որ կարգալույծը գիտակցաբար է ընտրում չարիքը:

31. Աստվածաշունչը վկայում է, թե ինչպես է չար ոգին Աստծու շնորհը չունեցողի, բայց դիվանագիտության փորձ անողի վրա հոխորտում. «Հիսուսին գիտեմ և Պողոսին ծանաչում եմ. բայց դուրս եմ» (Գործք 19:15):

32. Անվավեր «պատարագ» մատուցելով կարգալույծները մարդկանց փրկության փոխարեն դատապարտություն են հրամցնում:

33. Կարգալույծի՝ որպես կեղծ «հոգևորականի» հանդես գալը ոչ միայն հոգևոր ասպետություն է և Քրիստոսի խորհրդական Մարմնի՝ Ընդհանրական Եկեղեցու դեմ, այլ

և բացահայտ սրբապղծություն և Քրիստոսի հոտի՝ հավատավոր ժողովրդի խաբեություն: Նա վերածվում է «ոչխարի զգեստով հափշտակող գայլի» (Մատթ 7:15), որ հոտին առաջնորդում է դեպի հոգևոր կործանում:

34. Կարգալույծը, խաբելով հավատացյալին, նրան զրկում է Տիրոջ հետ իրական ս. հաղորդությունից: Մարդը կարծում է, թե հաղորդ է դառնում Քրիստոսին, սակայն Նրա Մարմնի և Արյան փոխարեն պարզապես հաց ու գինի է ստանում՝ մատուցված մի ասպտամբ սրբապիղծի կողմից: Սա հոգևոր թույնով շարունակական սպանություն է, իսկ Սուրբ Հոգին է կյանք տվողը: Կյանքի փոխարեն կեղծիք ու խաբեություն մատուցելը հակառակություն է Սուրբ Հոգուն:

35. Սուրբ Հոգու դեմ հայիյությունն անցնելի է համարվում այն պատճառով, որ մարդը գիտակցաբար մերժում է ճշմարտությունը և փակում ապաշխարության դուռը: Եթե անձինք գիտեն, որ իրենք կարգալույծ են, բայց շարունակում են ձևացնել, թե «հոգևորական» են, նրանք դառնում են հոգևորականի դերասան և գտնվում են գիտակցված չարիքի կերպարում: Կարգալույծն այլևս չի լսում Սուրբ Հոգու ձայնը, որը կանչում է զղջման, այլ լսում է իր հպարտության սնվող չարի կողմից խրախուսվող «ես»-ի հրամանները միայն: Սա հենց այն անցնելի վիճակն է, որի մասին զգուշացրել է Տերը:

36. Հովհաննես Արժիշեցին գրում է. «Քահանայական շնորհը մշտամնա է, եթե հոգևորականն իր կարգի մեջ է: Իսկ եթե կարգի մեջ չէ, չի կարող պատարագ մատուցել, չի կարող օգտվել քահանայագործության, խորհուրդների կատարման իրավունքներից և ոչ էլ շնորհաբաշխության իրավունքն ունի: Կարգից լուծարվածը վերաբերում է նաև օծումից լուծարվածին»:

37. Բաբելոն կաթողիկոս Կիվլեսերյանն իր «Քրիստոնեականը» աշխատության մեջ նշում է. «խորհուրդները սկզբունքորեն անջնջելի են: Բայց նրանք, ովքեր ուրանում են իրենց հավատքը՝ հավատք բառի քրիստոնեական և աստվածաբանական իմաստով, և հարում են ոչ քրիստոնեական կյանքի, ովքեր անաստված և հեթանոս են դառնում՝ ուրանալով իրենց քրիստոնեությունը, այնպիսիների վրայից ինքնին ջնջվում են կատարված խորհուրդները»:

Դարձյալ՝ նրանք, ովքեր ձեռնադրությամբ և օծումով կարգ են ստացել և այլևայլ պատճառներով կարգազրկվել կամ ինքնակամ կարգաթող եղել, այնպիսիների վրայից խորհուրդը ջնջվում է»:

38. «Կանոնագիրը Հայոց»-ում կանոնները հստակորեն մատնանշում են, որ կարգալուծությունը վերաբերում է քահանայական կարգին՝ իր բոլոր բաղադրիչներով, այդ թվում՝ օծումին:

Այսպիսով՝ անհրաժեշտ է հավատացյալ ժողովրդին հնարավորինս լայնորեն իրազեկել, լուսաբանել, որ զգուշանան և հեռու մնան կարգալույծների կեղծ ծիսակատարություններից: Դրանք ոչ միայն կանոնական ապօրինություն են, այլև սրբազան խորհուրդների անարգում, ծանրագույն մեղքեր՝ զայթակրություն և սրբապղծություն: Հավատացյալների համար այդ ամենը պարունակում է հոգևոր մեծ վտանգ:

Աստված ունի Բ ծրագիր

Առաջնությունն էստաֆետը. Իսրայելից մինչև Հայոց աշխարհ

Կյանքն իր էությունը ընտրությունների մի անվերջացող շղթա է, որտեղ յուրաքանչյուր բայ, որոշում կամ շրջադարձ մեզ դնում է Ա և Բ տարբերակների առջև: Մարդկային բնագործ մեզ սովորեցնում է միշտ ունենալ պահեստային ելք: Մենք կառուցում ենք մեր ապագան Ա նախագծի վրա՝ իր հույսով ու վստահությամբ, սակայն ենթահիտալկոցներն միշտ կրուն ենք Բ ծրագրի անհրաժեշտության զգացումը: Այդ տարբերակը մեր ապահովագրությունն է, մեր այն պահի հենարանը, երբ իրականությունը բախվում է մեր սպասելիքներից, և երբ առաջին ճանապարհը դառնում է անանցանելի:

Բայց արդյո՞ք Բ նախագիծը միայն մարդկային տկարության կամ անվստահության հետևանք է: Եթե ուշադիր դիտարկենք տեղեկությունների կառուցվածքը և պատմության ընթացքը, կտեսնենք մի զարմանալի օրինակափոխություն: Արարիչը՝ Բացարձակ Իմաստությունը, ինքնին էր արարչագործության մեջ ներդրել է փոխարինման և նորոգման սուրբ տրամաբանությունը: Աստվածային Բ ծրագիրը ոչ թե Արարչի ձախողման մշանն է, այլ Նրա անսահման սիրո և մարդու ազատ կամքի նկատմամբ ունեցած հարգանքի մեծագույն դրսևորումը:

Մարդն ունի ազատություն՝ ընտրելու Ա ծրագիրը՝ Աստծո հետ քայլելու ուղին, բայց մա նաև ունի սայթաքելու իրավունք, և հենց այստեղ է հայտնվում աստվածային նախախնամության հանճարը: Երբ մարդկային սխալը կամ ընթացությունը փակում է առաջին դուռը, Աստված չի կանգնեցնում պատմությունը: Նա բացում է երկրորդը, որը հաճախ լինում է ավելի լուսավոր, ավելի հաստատուն և ավելի փառավոր: Սա ծրագրերի ծրագիրն է, որտեղ ամեն մի կորուստ ունի իր վերականգնումը, ամեն մի «ուճայություն» (Աբել) ունի իր «հիմքը» (Սեթ), և ամեն մի սայթաքած առաջնությունն իր արժանավոր հաջորդը:

Յուրաքանչյուրս պետք է իմանանք կամ խորհենք այն մասին, թե ինչպես է աստվածաշնչյան պատմության միջոցով բացահայտվում այս մտավոր գաղտնիքը՝ սկսած արարչագործությունից մինչև հայ ազգի ընտրությունն ու Քրիստոսի երկրորդ Գալուստը: Այս իմաստով կարելի է ասել, որ Բ ծրագիրը ոչ թե փոխարինում է Ա-ին, այլ լրացնում ու կատարելագործում է այն՝ դառնալով մարդկության փրկության միակ և անխաթար երաշխիքը: Սա մի հանեատ մտորում է այն մասին, թե ինչպես է Աստված մեր ձախողումներից հյուսում հաղթանակի պսակը:

Ընտրյալ լինելը արտոնությունն է, այլ առաքելություն

Պատմության ընթացքում մարդկությունը հակված է եղել կարծելու, թե Աստծո ընտրությունը մի անփոփոխ կնիք է, որը հավերժական բարություն է երաշխավորում անկախ մարդու հետագա քայլերից: Սակայն Սուրբ Գրքի և պատմության փորձը հուշում է հակառակի մասին: Աստվածային Ա ծրագիրը երբեք մեխանիկական, ինքնաբերական չէ և չի կարող լինել, քանի որ այն կենդանի երկխոսություն է Արարչի և արարածի միջև: Բ ծրագիրը՝ իր իմաստային և բովանդակային էությունը, Աստծո պարտությունը չէ, այլ Նրա անսահման սիրո և արդարության դրսևորումը: Երբ մարդը սեփական կամքով հրաժարվում է իր կոչումից, իրեն վստահված առաքելությունից, անպայմանորեն մեկ ուրիշն է ստանձնում այդ լուծը՝ նաև հանուն հրաժարվողի փրկության: Աստվածաշնչյան բազում են այնպիսի օրինակներ, որոնք ընթերցողին կհուշեն անձնային Ա և Բ ծրագրեր լինելու մասին:

Աստվածաշնչյան պատմության մեջ 12 թիվը խորհրդանշում է լիություն և կառավարում: Հակոբ նահապետի 12 որդիները դարձան Իսրայելի 12 ցեղերի հիմնասյուները, սակայն ուշագրավ է, որ Աստվածաշնչյուն կան նաև այլ կերպարներ (օրինակ՝ Իսմայելը), որոնք նույնպես ունեցել են 12 որդի կամ իշխանավոր: Սա ցույց է տալիս, որ քանակական կամ արյունակցական գործոնը դեռևս բավարար չէ Աստծո հավերժա-

կան ծրագրում մնալու համար: Սա խոսում է այն մասին, որ Հակոբի 12 որդիներին իրենց առաքելության մեջ կարող էին փոխարինել Իսմայելի որդիները:

Աստված ընտրում է մեկին, բայց այդ ընտրությունը վավերական է մնում միայն այնքան ժամանակ, քանի դեռ ընտրյալը քայլում է Աստծո կամքի համաձայն, ուստի ազատ կամքն այս պարագայում ընտրության գրավական է: Եթե մարդը չի արդարացնում իրեն, նա կարող է զրկվել այդ կարգավիճակից:

Օրինակ՝ Ռուբենը՝ Հակոբի անդրանիկ որդին, պետք է ստանար առաջնության իրավունքը, բայց իր մեղքի պատճառով կորցրեց այն: Աստվածաշնչյան պատմության մեջ Ռուբենը Ա ծրագրի ձախողման ամենացավոտ օրինակներից մեկն է: Լինելով Հակոբի և Լիայի անդրանիկ որդին՝ նա օրենքով և բնությանը կոչված էր՝ կրելու տոհմի ողջ փառքը, հոգևոր առաջնորդությունն ու նյութական ժառանգությունը: Սակայն նրա անկայուն բնավորությունը համագեղցեց նրան, որ աստվածային Բ ծրագիրը ոչ թե պարզապես փոխարինեց նրան մեկ ուրիշով, այլ նրա արտոնությունները բաժանեց երեք արժանավոր եղբայրների միջև:

Ժառանգության իրավունքը փոխանցվեց Հովսեփին: Անդրանիկի առաջին իրավունքը հոր ունեցվածքից երկու բաժին ստանալու էր: Ռուբենի մեղքի պատճառով այս պատիվը տրվեց Հովսեփին, որին Աստված նախապատրաստել էր Եգիպտոսի փորձությունների միջոցով: Հովսեփն ստացավ կրկնակի ժառանգություն իր երկու որդիների՝ Եփրեմի և Մանասեի միջոցով, որոնք դարձան Իսրայելի առաջին ցեղերը: «Իսրայելի անդրանիկ որդի Ռուբենի որդիները (որովհետև նա էր անդրանիկը, բայց քանի որ իր հոր անկողինը պղծեց, նրա անդրանիկությունը տրվեց Իսրայելի որդի Հովսեփի որդիներին)» (ԱՄճա. Ե 1):

Թագավորական և իշխանական իրավունքը փոխանցվեց Հուդային: Թեև ժառանգությունը փոխանցվեց Հովսեփին, տոհմի առաջնորդի և թագավորական իշխանությունը տրվեց Հուդային: Աստված Հուդայի մեջ տեսավ այն պատասխանատվությունը, որը չկար Ռուբենի մեջ: Հենց Հուդայի սերնդից պիտի ծնվեին Դավիթ թագավորը և Փրկիչը: «Հուդա... քո հոր որդիները պիտի երկրպագեն քեզ... իշխանության գավազանը չպիտի պակասի Հուդայից, և ոչ էլ օրենսդիրը՝ նրա սերնդից» (ԾՆՆդ. ԽԹ 8–10):

Քահանայական և սպասավորության իրավունքը փոխանցվեց Ղևիին: Անդրանիկը տոհմի քահանան էր, որը զոհեր էր մատուցում Աստծուն: Ռուբենի սայթաքումից հետո այս սրբազան պաշտոնը հետագայում վստահվեց Ղևիի ցեղին, որը և դարձավ Աստծո տան սպասավորը: «Ահա ես Իսրայելի որդիների միջից վերցրի ղևաացիներին Իսրայելի որդիների բոլոր անդրանիկների փոխարեն... և ղևաացիները իմը պիտի լինեն» (Թվեր Գ 12): Ուստի՝ Աստված երբեք չի կաշկանդում մարդու ազատությունը: Եթե Ա նախագծի մասնակիցը դառնում է անպատու, Աստծո ծրագիրը չի դադարում: Աստված գործի է դնում Բ նախագիծը՝ գտնելով մոր սիրտ և մոր հոգի, որը պատրաստ է սպասավորելու ճշմարտությանը:

Իսրայելից դեպի Հայաստան. Բ ծրագրի իրականացումը

Հրեա ժողովուրդը դարեր շարունակ եղել է Աստծո Ա ծրագիրը մեխանիկական սպասման կրողը, սակայն երբ Քրիստոս՝ Աստվածորդին, եկավ Իր սեփական ժողովրդի մոտ, և այդ ժողովուրդը չընդունեց Նրան, տեղի ունեցավ մեծագույն շրջադարձը: Ընտրյալ լինելու հոգևոր էստաֆետը փոխանցվեց նրանց, ովքեր հավատացին և ընդունեցին: Հայ ժողովուրդը՝ որպես առաջին քրիստոնյա ազգ, դարձավ այդ աստվածային Բ ծրագրի վրա արտահայտությունը: Երբ նախկին «ընտրյալները» սայթաքեցին, Աստված բացեց դռները հեթանոսների համար, և հայերը, ընդունելով Լույսը, ստանձնեցին այն պատասխանատվությունը, որը ժամանակին պատկանում էր Իսրայելին:

Աստվածաշունչը լի է օրինակներով, որ-

տեղ մարդու անհավատարմությունը կամ հպարտությունն ստիպում է Աստծուն՝ «փոխել» Իր ծրագիրը կատարողին, բայց ոչ երբեք Իր վերջնական նպատակը: Ահա այդպիսի օրինակներից մի քանիսը համառոտ կներկայացնենք ստորև:

Սավուղ և Դավիթ. թագավորական իշխանության փոխանցումը: Սավուղը Աստծո Ա ծրագիրն էր Իսրայելի թագավորության համար: Նա ընտրվեց, օծվեց և ստացավ ամբողջական զորություն: Սակայն երբ Սավուղը սկսեց ապավինել իր սեփական կամքին և անտեսեց Աստծո պատվիրանները, Աստված «զղջաց», որ նրան թագավոր է դարձրել: Բ ծրագիրը՝ Դավիթը՝ պատանի հովիվը, որը ոչ թե մարմնական ուժով կամ ծագումով էր գերազանցում Սավուղին, այլ սրտի խնայողությամբ, դարձավ նոր ընտրյալը: Այս դեպքում Բ ծրագիրը դարձավ ավելի փառավոր, քան սկզբնականը:

Եսավ և Հակոբ. անդրանիկության իրավունքը: Եսավը՝ որպես անդրանիկ որդի, բնական օրենքով Աստծո օրհնության առաջին ժառանգորդն էր (Ա ծրագիր): Բայց մեկ ուսպապուրի դիմաց նա վաճառեց իր ընտրյալ լինելը: Բ ծրագիրը՝ Հակոբը, որ երկրորդն էր, ստացավ անդրանիկին տրվելիք օրհնությունը: Սա ապացույց է, որ Աստված նայում է ոչ թե ժամանակագրական հերթականությանը, այլ հոգևոր արժեքին:

Նմանօրինակ առաջնություն կամ անդրանիկություն էր շնորհված Իսրայելին՝ հրեա ժողովրդին, որը հրեա ազգի սայթաքումից հետո փոխանցվեց հայ ազգին: Այս գաղափարը ամենից հստակ երևում է Քրիստոսի «Անարժեք մշակների մասին» կամ «Թագավորական հարսանիք»-ի առակներում: Երբ հրավիրվածները չէկան խնջույքին, Տերը հրամայեց փողոցներից հավաքել բոլորին:

Հրեա ժողովուրդը կոչված էր՝ լինելու «քահանայական թագավորություն» և Լույս ամբողջ աշխարհի համար: Երբ Քրիստոս՝ մարմնացյալ Աստված, եկավ, հրեա ազգը՝ որպես պաշտոնական Ա ծրագիր, պետք է առաջինը ընդուներ Նրան: Հրեաների մերժումը Գողգոթայում ոչ թե կասեցրեց Աստծո ծրագիրը, այլ այն ուղղեց դեպի մյուս ազգերը:

Երբ Մերձավոր Արևելքում և հրեական միջավայրում քրիստոնեությունը դեռ հավանական չէր, հայ ժողովուրդը՝ որպես հավաքական ամբողջություն, 301 թվականին քրիստոնեությանն ասաց՝ Այո: Հայերն ընդունեցին այն հոգևոր ժառանգությունը, որից հրաժարվեց Իսրայելը: Մենք դարձանք «Նոր Իսրայել»՝ կրելով Աստծո ներկայությունը՝ ազգային-հավաքական մակարդակով: Սա էր Աստծո Բ ծրագիրը: Եթե առաջին ընտրյալը մերժում է Փրկչին, ապա լեռնաշխարհի մի ժողովուրդը պետք է դառնա այդ Փրկության առաջամարտիկը: Այս գեղեցիկ նկարագրության մեջ, սակայն, պետք է իմանալ, որ Բ-ն նույնպես կարող է կորցնել իր կարգավիճակը: Աստվածաշնչյան ամենացավոտ ու միաժամանակ արդարացի ճշմարտությունն այն է, որ ընտրյալ լինելը անփոփոխ չէ: Պողոս առաքյալը հռոմեացիներին ուղղված թղթում հստակ զգուշացնում է հեթանոսներին (այդ թվում՝ մեզ)՝ օգտագործելով ձիթեմու օրինակը: «Եթե Աստված բնական ճյուղերին (հրեաներին) չխնայեց, զգուշ եղիր, գուցե քեզ էլ չխնայի» (Հռոմ. ԺԿ 21):

Հայ ազգն էլ այսուրև ունի մարտահրավեր: Եթե մենք՝ որպես Բ ծրագիր, որ դարձավ Ա ծրագիր, սկսենք ապրել առանց Աստծո, եթե մեր քրիստոնեությունը դառնա միայն թանգարանային մուշկ կամ լոկ պատմություն, ապա մենք նույնպես կանգնած ենք սայթաքելու վտանգի առաջ: Աստված սահմանափակված չէ Հայաստանով կամ որևէ այլ ազգով: Եթե մենք դադարեցնենք լինել Լույսի կրողը, նա ունի և՛ Գ ծրագիր, և՛ Դ ծրագիր՝ այնքան, որքան հարկավոր է Լույսի կրողին գտնելու համար, և, այո, նա կարող է քարերից որդիներ հանել Աբրահամի համար: «Եվ մի կարծեք, թե ձեր մտքում կասեք՝ «Մենք



Անպտուղ թզնու անհծումը

Աբրահամի որդիներն ենք», որովհետև ասում են ձեզ, որ Աստված կարող է այս քարերից էլ Աբրահամի համար որդիներ հանել» (Մատթ. Գ 9):

Ընտրյալ մնալու կերպը

Տասը կույսերի առակը: Աստվածաշնչյան ամենաազդեցիկ պատկերներից մեկը տասը կույսերի առակն է: Այն Ա և Բ նախագծերի բախման կատարյալ օրինակ է անձնական և ազգային մակարդակում: Բոլոր տասը կույսերն էլ հրավիրված էին, բոլորն էլ ունեին լապտերներ, բայց տարբերությունը «յուղի» մեջ էր: Ոմանք պատրաստված էին, իսկ ոմանք հույս ունեին կորզել նրանցից, ովքեր արդեն իսկ պատրաստվել էին: «Ռմաստուններն իրենց լապտերների հետ ամաններով յուղ վերցրին» (Մատթ. ԻԵ 4): Հայ ազգը՝ որպես քրիստոնյա աշխարհի «առաջնեկ», ստացել է լապտերը (Եկեղեցին, ծեսը, մշակույթը), սակայն «յուղը» մեր ապրված հավատն է: Եթե մենք հպարտանում ենք միայն լապտերով (պատմությամբ), բայց չունենք յուղ (ներկա հոգևոր կյանք), մենք վտանգում ենք մեր Բ ծրագրի կարգավիճակը: Երբ Փեսան՝ Քրիստոս, գա, լոկ «քրիստոնյա ազգ» կոչվելը չի բացելու դռներ, եթե լապտերը հանգամ լինի: Ուստի՝ մշտապես պատրաստված լինելը ընտրյալ մնալու գրավականն է:

Վարդանանց ուխտը: Վարդան Մամիկոնյանի ժամանակ հայությունը կանգնած էր ընտրության առաջ: Պարսկաստանը առաջարկում էր Ա ծրագիր՝ լինել հզոր կայսրության մաս՝ ուրանալով Քրիստոսին: Հայերն ընտրեցին Բ ծրագիր՝ մահը՝ հանուն հավատի, որն իրականում Աստծո աջքուն ճշմարիտ Ա ծրագիրն էր: Այդ ժամանակ մեր «յուղը» առատ էր, և հենց դա պահեց մեր ազգային ինքնությունը:

Անպտուղ թզնու նախագուշացումը: Քրիստոսի անեծքն անպտուղ թզնուն ամենախիստ դասն է այն ազգերի համար, որոնք ունեն արտաքին փառք, բայց ներքին դատարկություն: Թզնուն հեռվից կանաչ էր ու գեղեցիկ: Նա կարծես Ա ծրագրի խորհրդանիշ լինել էր՝ լի կյանքով, բայց Տերը նրա վրա պտուղ չգտավ ու անհիծեց նրան: «Թող այլևս ոչ ոք թեզնից պտուղ չուտի հավիտյան» (Մարկ. ԺԿ 14): Մենք ունենք հավաքավոր եկեղեցիներ, հարուստ մատենագրություն, բայց եթե մեր հասարակության մեջ չկան սեր, արդարություն և սրբություն, մենք նմանվում ենք այդ թզնուն: Աստված կարող է չորացնել մի ազգի հոգևոր աղբյուրները, եթե դրանք այլևս պտուղ չեն տալիս Տիրոջ համար: Այլ կերպ ասած՝ պետք է զգուշանալ միայն տերևներով գեղեցկանալուց, քանի որ ծառի կարևոր առաքելությունը պտղաբերությունն է:

Գ ծրագիրը. ովքեր են սպասում հերթուն

Եթե հին քրիստոնյա ազգերը (ինչպես՝ հայերը, եվրոպացիները) հրաժարվում են իրենց պտուղներից, Աստված բարձրացնում է նորերին: ➔ էջ 8

Քրիստոնեությունը և հին ու նոր քաղաքները

«Ստեղծեց զհողմը, ինչքան լայն է դուռը, և ընդարձակ՝ ճանապարհը, որ դեպի կորուստ է տանում, և բազմաթիվ են նրանք, որ մտնում են դրանով»

(Մատթ. 7. 13):

Բեն «քաղաքների» բառը համեմատաբար վերջերս է սկսել շրջանառվել հայոց լեզվում փոխառված ռուսերեն «мегаполис» բառից, որն իր հերթին լեհերեն համանուն բառն է՝ քաղաքացի նշանակությամբ, բայց երևույթն աշխարհի պես հին է և բնավ չի սահմանափակվում քաղաքային բնակչությամբ: Ըստ բացատրական բառարանների՝ այն նշանակում է՝ 1. Ցարական Ռուսաստանում մանր առևտրականների, արհեստավորների, ցածր պաշտոնյաների քաղաքային դասին պատկանող անձ: 2. Նեղ՝ սահմանափակ հայացքների տեր մարդ, որ հետաքրքրվում է միայն իր մանր անհատական շահերով: 3. Հանգիստ՝ բարեկեցիկ կյանքի սովոր քաղաքացի:

ՀԱ հանրագիտարանում Ա. Ադիբեկյանի հեղինակած բովանդակալից, բայց կարճամիտ բառահոգվածում կարդում ենք. «Հասարակության ստորին և վերին խավերի միջև քաղաքների գրաված միջանկյալ դիրքը պայմանավորել է քաղաքների հիմնական սոցիալական գծերի հակասականությունը. մի կողմից՝ բաքված ճգնաժամային և խնայողություն, ձևական ավանդապահություն, իր «փոքրիկ աշխարհի» հակադրումը ստորին խավերին (որոնց ատում է և, միաժամանակ, ձգտում նրանց, քանի որ նրանց շրջանում իրեն բարձրության վրա է զգում) և վերին խավերին (որոնց երազում է հասնել և ատում է, քանի որ իր համար անհասանելի են), մյուս կողմից՝ հարստության փայլելու ձգտում (ինչ-որ մեկից «առաջ անցնելու տենչ»), այն ամենին հետևելը, ինչը համարվում է «նորածն», իրեն ամենիջականորեն չառնչվող «բարձրագույն» թեմաների շուրջ շաղակրատելը: Քաղաքները որսնորվում է արվեստում (ծայրահեղ սենտիմենտալություն, մելոդրամատիկություն,

երջանիկ վախճանով սյուժեներ), բարոյակամության մեջ (կեղծ բարեպաշտություն), կենցաղում (ունևորությունը ցուցադրելու նպատակով ձեռք բերված «հավերժական» իրերով իրեն շրջապատելը), մտածելակերպում (երևույթներն ընկալելու և գնահատելու անբնականականություն), արժեքային կողմնորոշումներում և իդեալներում («մարդ դառնալ», «ապրել, ինչպես բոլորը» ևն): Քաղաքները բնորոշ է երկչու անակզբունքայնությունը հասարակական-քաղաքական կյանքում...»:

Զինացի մեծահոշակ իմաստուն Կոնֆուցիուսը որպես «քաղաքների» բառի նույնիմաստ հոմանիշ՝ օգտագործում է «ցածրոգի», «փոքր»՝ «գաճաճ» բառերը՝ ի հակադրություն «վեհանձն»՝ «ազդիվ» եզրույթների:

Ա. Իսահակյանը նյութապաշտության տարածմամբ մտահոգ և մարդկանց հոգեկան անձկությունների մատնվելու կանխագագամամբ՝ հիմնականաբար մտնում մարդարեի նման ահազանգում էր «հոգու սովի» մասին. «Ես ձեզ ասում եմ՝ կգա Ռգու սով, // Եվ դուք կքաղաքեք ձոխ սեղանի մոտ...»:

Ցավալի է տեսնել քաղաքների հոգեբանության և աշխարհայացքի դրսևորումը յուրաքանչյուր մարդու վարքագծում, բայց առավել ցավալի է դրա օրոքստորե արմատավորումը ողջ հասարակության մեջ՝ որպես արելակերպ, որպես կյանքի իմաստ, մասնավորապես ներկայումս՝ Արևմուտքի սպառողական հասարակության գաղափարախոսության և ապրելակերպի ուժգնացած ազդեցությամբ:

Դիպուկ է ռուս անվանի փիլիսոփա Նիկոլայ Բերդյաևի՝ այս երևույթի բնութագիրը. «Մարդը, որը մերժում է գերբնական արժեքները, որն այլևս չի կամենում խոնարհվել սուրբ տաճարների, հավերժական գրքերի, մեծ անունների, չքնաղ բաների առաջ, որը պատկառման չի տառնում գեղեցկության և վեհանձնության, իմաստության, կենդանի պատմության մեջ ի հայտ եկող հավերժության առաջ, մարդը, որն աստվածացնում է իրեն, մարդկային ընդունում է որպես իր

ամենամիկրակա սրբություն, չգոյություն է, դատարկություն և քաղքենիություն»:

Քաղքենիություն բազմաշերտ երևույթի ամենից մերժելին, հոգեկործանը և ամեն ինչի նախակիցը, այնուամենայնիվ, ընչապաշտությունն է՝ մինչև իսկ տները փոքրիկ թանգարանների վերածելը, հարստանալու անհագ ծարավն ու այդ «պատանքային երկրային դրախտը» վայելելու կիրքը: Հակառակ դրա՝ Աստվածաշունչը բազմիցս է մեզ հիշեցնում, որ ինչքն էլ, հարստությունն էլ, որքան էլ այսօր սեփականության վկայականները փաստեն մեր իրավունքները, ժամանակավորապես՝ մեզ պարտքով տրված բաներ են: Ավելին՝ կյանքն էլ է անցավոր՝ մարդուն ժամանակավորապես՝ պարտքով տրված, որ ամեն վայրկյան կարող է հետ պահանջվել, ինչպես այդ մասին վկայում է Քրիստոսի «Ամենիտ մեծահարուստի մասին» առակը. «Ապա ժողովրդին ասաց. «Տեսե՛ք, որ զգույշ լինե՛ք ամեն տեսակ ազահությունից, որովհետև մարդու կյանքը իր կուտակած հարստության մեջ չէ»: Եվ նրանց մի առակ պատմեց ու ասաց. «Մի մեծահարուստի արտերը առատ բերք տվեցին. և նա խորհեց իր մտքում և ասաց. «Տեսնե՛մ ինչ կարող եմ անել, քանի որ բերքս կուտակելու տեղ չկա: Գիտե՛մ, — ասաց նա, — թե ինչ պետք է անեմ. կքանդեմ իմ շտեմարանները ու ավելի մեծերը կշինեմ ու այնտեղ կհավաքեմ ցորենը և իմ մեքենա բարիքը. և ինքս ինձ կասեմ՝ ո՛վ մարդ, շատ տարիների համար ամբարված բազում բարիքներ ունե՛ս, հանգիստ արա, կեն, խմի՛ր ու ուրախ եղի՛ր»: Աստված նրան ասաց. «Ամենիտ, հենց այս գիշեր հողի թեզանց պահանջելու են, և իսկ ինչ որ պատրաստել ես, ո՛ւնե՛մ է լինելու»: Նույնպես նաև նա, ով իր անձի համար գաճձ կհավաքի և Աստուծով չի հարստանա» (Ղուկ. 12. 14—21):

Ավելին՝ Փրկչի վարդապետության համաձայն՝ «ուր ձեր գանձերն են, այնտեղ և ձեր սրտերը կլինեն» (Մատթ. 6. 21), իսկ սիրտը մարդու էության կենտրոնն է, որից բխում են զգացմունքները, նախասիրությունները,

խոսքերը, որոշումները՝ գործերով հանդերձ: Եվ «ոչ ոք չի կարող երկու տիրոջ ծառայել. կամ մեկին կատի և մյուսին կսիրի, կամ մեկին կմեծարի և մյուսին կարհամարհի. չեք կարող ծառայել Աստծուն և մամոնային» (Մատթ. 6. 24):

Սողոմոն Իմաստունն իր «Ժողովող» գրքում փորձում է երջանկություն գտնել արեգակի ներքո, այսինքն՝ երկրային սահմաններում. «Ինչ որ աչքս ուզեց, ինձ չգրկեցի դրանից, և ոչ մի ուրախության համար սրտիս վրա արգելեց չդրի» (ժող. 2. 11): Բայց իզուր, քանզի ամեն վայելքից հետո մարդու բերանում մնում է միայն մոխրի համը՝ դատարկության դառը զգացումը. ահա այն եզրակացությունը, որին նա հասնում է իր որոնումների և փորձառության ավարտին: Ադամական մեղքով պայմանավորված անխուսափելի մահը, անվերջանալի տառապանքները՝ ծննդյան օրից սկսյալ, ծերությունն ու հիվանդությունները, ամենայն վայելքն ու ուրախությունը, հարստությունն ու մինչև իսկ իմաստությունը, որը բացահայտում է գեղեցկությամբ սքողված կյանքի այլանդակությունը, ուր ամեն ինչ, մարդու կամքից անկախ, ունի իր ժամանակը՝ «ծնվելու և մեռնելու, լալու և ուրախանալու, սիրելու և ատելու, պատերազմի և խաղաղության» (3. 1—9), փխրուն, դյուրաբեկ, հեղհեղուկ են դարձնում մարդու երկրային երջանկությունը: Հետևաբար, ըստ աստվածաշունչի հեղինակի, «ունայնություն ունայնությանց» է այս աշխարհում բացարձակ երջանկության որոնումը, որը և գալիք սերունդներին ավանդված մի խորհուրդ է՝ կյանքի իմաստի փնտրության անդադանալու իրական ճշմարտության ուղին գտնելու: Եվ միայն Աստծո կամքի կատարումն է՝ անխուսափելի հատուցման հեռանկարով, որ, ըստ հեղինակի, կարող է մարդուն այս աշխարհում, թեկուզև սահմանափակ, երջանկություն պարգևել, թեև Հին Կտակարանում դեռևս հետմահու երկնային բերկրալի կյանքը սուկ մարգարեության ձևով գոյություն ուներ: ➔ էջ 6



Հակոբ Հովնաթանյան. Եփրեմ Ա Կաթողիկոս, 1831 թ.

Եփրեմ Ա Չորագեղցի Կաթողիկոսի դերը

այժմ մեզ ուրախություն է այս երեխային ընդունելով՝ քո օջախին մի չնչին ծառայություն մատուցել: Ապա դառնալով խաչատուրի՝ օրհնում է նրան և ասում. «Մխիթարվիր, զավակս, այժմ հայրդ կգնա, իսկ մայրդ քեզ այլևս չի տեսնի. այսուհետև ես կլինեմ քո հայրը. մոտ արի, գրկիր ինձ ու համբուրիր ձեռքս» (Պ. Հակոբյան, Խ. Աբովյան, Երևան, 1967, էջ 108):

Հենց ամենակարգից պատանի Աբովյանն արժանանում է Եփրեմ Հայրապետի բարիհաճ և ջերմ վերաբերմունքին, և դա տարիներ հետո վերածվում է փոխադարձ վստահության: Եփրեմ Կաթողիկոսը հավատարիմ է մնում իր հայրապետական խոստմանը՝ «...այսուհետև ես կլինեմ քո հայրը»: Այնքան խոր հետք է թողել Հայրապետը Աբովյանի կյանքում, որ տարիներ անց նրան բնութագրել է հետևյալ կերպ. «Հայերի մեջ մինչև այժմ էլ սուրբ համարվող բարերար և բարեպաշտ Կաթողիկոս Եփրեմը» (Խ. Աբովյան, Երկերի լիակատար ժողովածու, Կ. Վ. Երևան, 1956, էջ 176—177): Իսկ մեկ այլ առիթով գրում է. «...պետք է պարզապես խոստովանեմ, որ նրա մի քանի չափազանց դաստիարակիչ խրատները, որ սովորություն ուներ տալ այդ պատկառելի ծերունին ինձ, մինչև օրս էլ այնքան թանկագին, այնքան հաճելի են եղել ինձ համար, որ ես չափազանց ապերախտ կլինեի, եթե դրանք մոռանայի» (Խ. Աբովյան, Երկերի լիակատար ժողովածու, Կ. Վ. Երևան, 1956, էջ 306):

Աբովյանը Եփրեմ Կաթողիկոսի հետ ազգակցական կապ ուներ, և դա նույնպես նպաստել էր նրանց մտերմությանն ու ջերմ հարաբերությանը: Այդ բարեկամական, խորապես մարդկային փոխհարաբերությունների մասին Աբովյանը հետաքրքիր մանրամասներ է պատմում. «...Կաթողիկոս Եփրեմը մանկության տարիներին ինձ «իմ գառնուկ» էր անվանում, իսկ պատանեկության շրջանում, ներքեցեք անհամեստ խոստովանության համար, ինձ համարում էր «իր Ռափայելը»» (Խ. Աբովյան, Երկերի

լիակատար ժողովածու, Կ. Վ. Երևան, 1956, էջ 177): «Իր գառնուկն» էր անվանում նրա հետ ունեցած ազգակցության, ինչպես նաև կարմրաթուշ, լիքը և թարմ տեսքի համար:

Եփրեմ Կաթողիկոսն աչքի ծանր հիվանդություն ուներ, և նրան անհրաժեշտ էր դեղ, որով հնարավոր կլիներ մեղմել խնդիրը: Նա դեղ բերելու խնդրանքով դիմում է Աբովյանին, և վերջինս, անսալով Հայրապետի խնդրանքին, գնում և բերում է: Այն պետք էր բերել Սարգարապատի բերդից, սակայն հարկ է մշել, որ այդ օրերին վերոնշյալ վայրում մոլեգնում էր սարսափելի ժանտախտ, որի պատճառով բազմաթիվ մարդիկ էին մահանում: Իրեն վտանգելով՝ Աբովյանը գնում է Սարգարապատ, գիշերում այնտեղ, ապա զինվորական բժիշկ Ալեքսեյ Ֆեոդորովիչ Տեմյուկովից վերցնում դեղն ու բերում Մայր Աթոռ, և հենց այդ օրվանից Եփրեմ Կաթողիկոսը նրան անվանում է «իր Ռափայել»: Գիշտ է, Աբովյանը վարակվում է ժամտախտով և մեկ ամիս տառապելուց հետո փրկվում, բայց կատարում է Հայրապետի ցանկությունը:

Իսկ ինչո՞ւ է Եփրեմ Կաթողիկոսը Աբովյանին անվանել «իր Ռափայել»: Այս անվանման հիմքը սուրբգրային է: Հին Կտակարանի Տոբիթ գրքում պատմվում է, թե ինչպես բարեպաշտ Տոբիթի որդի Տուբիթ Ռափայելը հրեշտակի օգնությամբ գտնում է իր հոր տեսողության բժշկման դեղը (Տոբիթ 2): Սուրբգրային այս վկայության օրինակով Եփրեմ Կաթողիկոսը Աբովյանին անվանում է «իր Ռափայել»՝ ցույց տալով իր հայրական սերն ու գնահատանքը նրա նկատմամբ:

Անչափ տպավորիչ է Եփրեմ Կաթողիկոսի և Խաչատուր Աբովյանի հրաժեշտի պահը, երբ Աբովյանը որոշել էր ուսման նպատակով թողնել Սուրբ Էջմիածինն ու մեկնել արտերկիր: Սակայն մինչև հրաժեշտի պահին հասնելը՝ Աբովյանը պետք է հաղթահարեր մի քանի ծանր ու դժվարին փորձություններ: Այդ ժամանակ Եփրեմ Կաթողիկոսն արդեն կուրացել էր և վա-

տառոջության հետևանքով անգործունակ դարձել, իսկ Աբովյանի հեռանալուց մի քանի ամիս անց՝ 1830 թվականին, թողնում է Հայրապետական գահը: Ընդգծելու համար նրանց վերջին հանդիպման կարևորությունը Աբովյանի կյանքում՝ անհրաժեշտ է նաև ներկայացնել դրան նախորդող դեպքերն ու իրադարձությունները:

Վաղուց Աբովյանը երազում էր ուսման մեկնել, սակայն այն սկզբում միայն ցանկություն էր, որի մասին գրում է. «...ես գիտեի եվրոպա, Մոսկվա և Վենետիկ անունները, որոնցից երկուսը՝ հատկապես նրա համար, որ այնտեղ էին գտնվում հայկական ամենալավ ուսումնական հաստատությունները: Դեպի նրանց, դեպի նրանց էր ձգտում հոգիս դյուրակառ ուժով: 15 տարեկան հասակից հենց նրանք են եղել իմ ամոռնաց երազանքները: Միջոցներ չունեի, և շատերին արած իմ խնդրանքը՝ ինձ այնտեղ ուղարկելու մասին, մնաց առանց որևէ ուշադրության, առանց հետևանքի՝ իմ օգտին: Ես ցանկանում էի ավելի շատ կրթություն ձեռք բերել, որպեսզի հետագայում հոգևորական կոչումը չկրեմ առանց գիտելիքների և արժանիքների» (Խ. Աբովյան, Երկերի լիակատար ժողովածու, Կ. Վ. Երևան, 1956, էջ 177):

Աբովյանի՝ արտերկիր մեկնելու և ուսում ստանալու ցանկության վրա մեծ հետք թողեց, դեռ ավելին, այն բորբոքեց Դորպատի համալսարանի պրոֆեսոր Ֆրիդրիխ Պարրոտը. «Հայտնվեց Պարրոտը՝ իմ փրկարար հրեշտակը: Տեսնելով բարությանը լի նրա առաջին հայացքը՝ հոգիս զգաց իմ բարեկամ հովանավորին» (Խ. Աբովյան, Երկերի լիակատար ժողովածու, Կ. Վ. Երևան, 1956, էջ 178): Վերջինս 1829 սեպտեմբերի 8-ին գալիս է Սուրբ Էջմիածին՝ նպատակ ունենալով մի խումբ գիտնականների հետ Արարատի գագաթը բարձրանալու: Նրանց՝ Մայր Աթոռում եղած օրերին Աբովյանին կարգում են ուղեկից՝ հոգալու կարիքները: Ծանոթանալով խաչատուրի հետ և տեսնելով նրա ունակությունները՝ Պարրոտը խնդրում է Կաթողիկոսին,

Հաբեթի սերնդաբանությունը

Հաբեթը Նոյի երեք որդիներից էր: Ծննդոց գրքում նրա անունը հիշատակվում է Նոյի արքեպիսկոպոսի և Քամի անեծքի պատմության դրվագում, ապա՝ Նոյի սերնդաբանության մեջ՝ որպես Եգեյան ծովի, Անատոլիայի, Կովկասի, Հունաստանի և Եվրասիայի այլ երկրների ժողովուրդների նախահայր: Միջնադարյան և ժամանակակից եվրոպական ավանդազրույցներում նա ներկայացվում է որպես եվրոպական ժողովուրդների նախահայր:

Հաբեթ անվան իմաստի շուրջ առաջացել են մի շարք լեզվաբանական վեճեր: Անվան իմաստի երկու հնարավոր ստուգաբանական տարբերակ կա: Առաջին՝ այն ծագում է արամեերեն «*ստի*» արմատից, որը նշանակում է «տարածել»: Այս դեպքում անունը կնշանակի «թող Նա տարածի»՝ ըստ Ռաշիի (Շլոմո Յիցչակի, մոտ 1040–1105 թթ.) մեկնաբանության: Երկրորդ՝ եբրայերեն «*սի*» արմատից բխեցնելու դեպքում այն կնշանակի «զեղեցվություն», և անվան իմաստը կլինի «զեղեցիկ»:

Հաբեթն առաջին անգամ հիշատակվում է Հին Կտակարանում՝ որպես Նոյի երեք որդիներից մեկը՝ փրկված ջրհեղեղից: Ծննդոց գրքում Նոյի որդիները միշտ նույն հաջորդականությամբ են թվարկվում՝ Սեմ, Քամ և Հաբեթ: Ծննդոց 9:24-ում Քամն անվանվում է «կրտսեր որդի», իսկ Ծննդոց 10:21-ում Սեմը հիշատակվում է որպես «Հաբեթի ավագ եղբայր»: Ժամանակակից ուսումնասիրողների մեծ մասն ընդունում է, որ Սեմ–Քամ–Հաբեթ հաջորդական թվարկումն արտացոլում է նրանց ծննդյան կարգը, բայց դա միշտ չէ, որ այդպես է. Մովսեսն ու Ռաբբելը նույնպես հայտնվում են նման ցանկերի սկզբում՝ չնայած նրանց՝ կրտսեր եղբայր-քույր լինելու հստակ նկարագրություններին: Այնուամենայնիվ, Հաբեթը ռաբբինական գրականության մեջ համարվում է Նոյի ավագ որդին:

Ջրհեղեղից հետո Հաբեթը հիշատակվում է Նոյի արքեպիսկոպոսի պատմության մեջ: Քամը տեսնում է Նոյին հարբած ու մերկ իր վրանում և պատմում է իր եղբայրներին,



Ջեյմս Տիտ, Սեմը, Քամը, Հաբեթը, 1896–1902 թթ.

որոնք այնուհետև ծածկում են իրենց հորը թիկնոցով՝ անաչելով նրա մերկությունից: Երբ Նոյն արթնանում է, նա անիծում է Քամի որդուն՝ Քանանին, և օրհնում Սեմին ու Հաբեթին: «Օրհնյալ լինի Տերը՝ Սեմի Աստվածը, իսկ Քանանը նրան ծառա թող լինի: Աստված ընդարձակի Հաբեթին, և նա Սեմի վրաններում բնակվի, իսկ Քանանը ծառա լինի նրան» (Ծննդ. 9:26–27): Ծննդոց գրքի 10-րդ գլխում նկարագրվում է, թե ինչպես է ջրհեղեղից հետո երկիրը բնակեցվում Նոյի որդիներով՝ սկսած Հաբեթի սերունդներից.

«Հաբեթի որդիները՝ Գոմեր, Մագոգ, Մադա, Հավան, Թոբել, Մեսեթ և Թիրաս: Գոմերի որդիները՝ Ասքանաս, Ռիփաթ և Թորգոմա: Հավանի որդիները՝ Եղիսա, Թարսիս, Կիտացիներն ու դոդացիները: Սրանցից բաժանվեցին ծովեզրյա ազգերն իրենց երկրներով՝ ամեն մեկն իր լեզվով, իրենց ազգերով իրենց տոհմերում» (Ծննդ. 10:2–5):

Հաբեթը կարող է լինել հունարեն Iapetos անվան տառադարձությունը, որը հելլենական ժողովուրդների նախնին է: Նրա որդիներն ու թոռները բնակվում են Եգեյան ծո-

վը, Հունաստանը, Կովկասն ու Անատոլիան ընդգրկող աշխարհագրական տարածքում՝ Հունիա/Հավան, Հռոդոս/Ռոդանիս, Կիպրոս/Կիտին և Արևելյան Միջերկրածովյան տարածաշրջանի վայրերում: «Հաբեթի օրհնության» իմաստը, կարծես, այն է, որ Հաբեթը (հունական ծագում ունեցող ժողովուրդ) և Սեմը (սարայեցիները) համատեղ պիտի կառավարեին Քանանին (Պաղեստինը):

19-րդ դարից մինչև 20-րդ դարի վերջը Հաբեթը սովորաբար համարվում էր փոշտացիների հայր, որոնք իշխում էին Քանանի վրա Իսրայելի և Հուդայի նախամիապետական և վաղ միապետական շրջանում: Այս տեսակետը համապատասխանում էր Ծննդոց գրքի ծագման մասին ըմբռնմանը, համաձայն որի՝ այն գրվել է սկսած Սողոմոն թագավորի ժամանակներից, երբ փոշտացիները դեռևս գոյություն ունեին (նրանք անհետացան պատմությունից ասորեստանցիների կողմից Քանանի նվաճումից հետո): Կան ապացույցներ, ըստ որոնց՝ փոշտացիները ծագել են Եգեյան ծովից եկած հույն ներգաղթյալների խմբից: Ներգաղթյալների խումբը Քանանում բնակություն է հաստատել Ք. ա. մոտ 1175 թ.: ուշ բրոնզի դարաշրջանի փլուզման ժամանակ: Ժամանակի ընթացքում նրանք խառնվել են բնիկ քանանական հասարակությունների հետ և փոխառել նրանցից որոշ սովորույթներ՝ պահպանելով իրենց յուրահատուկ մշակույթը: Այս տեսակետը գլխավորապես հիմնված է այն փաստի վրա, որ հնագետները Միջերկրականի ափամերձ հարթավայրերում և հարակից տարածքներում փոշտացիների ժամանակաշրջանին պատկանող շերտեր պեղելիս նյութական մշակույթի (արձանիկներ, խեցեղեն, կրակարաններ և այլն) նմանություններ են հայտնաբերել Եգեյան-հունական և փոշտացիների մշակույթի միջև, ինչը ենթադրում է ընդհանուր ծագում: Սակայն Ծննդոց 10:14-ը որպես փոշտացիների նախահայր նույնականացնում է Քանանի, այլ ոչ թե Հաբեթին: ➔ էջ 8

Խաչատուր Աբովյանի կյանքում

որ Աբովյանը ևս միանա իրենց արշավախմբին՝ որպես վանքի ներկայացուցիչ: Ստանալով Հայրապետի օրհնությունը՝ Աբովյանը միանում է նրանց և բարձրանում Արարատի գագաթ. «Եվ Նոյան սրբազան լեռան կատարին Սուրբ Խաչի հետ միասին բարձրացան և՛ իմ ուխտն ու աղոթքը. բայց դեռևս հեռու էր այն վայրը, որտեղից ես պիտի դեպի Արարատը վերադառնայի՝ կանաչ ճյուղը ձեռքիս» (Խ. Աբովյան, Երկերի լիակատար ժողովածու, հ. VII, էջ 178):

Արարատի գագաթ վերելքից հետո, երբ Աբովյանը հրաժեշտ է տալիս Պարրոտին, խնդրում է նրան պետական միջոցներ ձեռք բերել, որ կարողանա ուսումը շարունակել արտերկրում. «Պարրոտը մեկնեց՝ դեմքի սառը արտահայտությամբ և սառը եղանակով ասելով. «Կշանամ, բայց ոչ մի հաստատ բան Ձեզ խոստանալ չեմ կարող»: Ինձ միայն հարկավոր էր, որ նա իր երկաթյա կամքով միջնորդեր ոչ թե հոգևոր կոչումից, այլ մի քանի տարով ինձ իմ ծառայությունից ազատելու մասին» (Խ. Աբովյան, Երկերի լիակատար ժողովածու, հ. VII, էջ 178):

Արդեն 1829 թ. նոյեմբերին Աբովյանը Սիմոնի հաստակ խնդրագիր է ներկայացնում՝ խնդրելով օրհնական կարգով թույլ տալ իրեն մեկնել արտերկիր՝ ուսման: Սիմոնի անդամները խոստանում են նրան զարմանք իրենց հաշվին ուղարկել Մոսկվա՝ Լազարյան ճեմարանում ուսանելու, միայն թե. «...թողնեի իմ մտադրությունը՝ հետևելու այդ լուսբերականներին, որոնք չեն ճանաչում ոչ պահեք, ոչ սրբերին» (Խ. Աբովյան, Երկերի լիակատար ժողովածու, հ. VII, էջ 178): Այստեղ միջանկյալ նշենք, որ դեռևս 1821 թ. Աբովյանը, շնորհիվ Մայր Աթոռի միաբան և իր հեռավոր ազգակից Անտոն արքեպիսկոպոս Մուղնեցու ջանքերի, մեկնել էր Թիֆլիսի հայկական ուսումնարան՝ կրթությունն ավարտելու և ռուսերեն սովորելու: Չորս տարի հետո վերադարձել էր Եջմիածին և նշանակվել Սիմոնի և Կաթողիկոսի քարտուղար ու թարգման միաժամանակ (տե՛ս Խ. Աբովյան, Եր-

կերի լիակատար ժողովածու, հ. VII, էջ 177): Պետք է ասել, որ Մայր Աթոռի միաբանության համար Աբովյանի՝ Սուրբ Էջմիածնից հեռանալը մեծ կորուստ էր. դա էր պատճառը, որ ամեն կերպ փորձում էին նրան պահել այնտեղ: Օրինակ՝ երբ Վեհափառ Հայրապետը օտարազգի հյուրեր էր ունենում, Աբովյանը սովորաբար ներկա էր լինում և թարգմանում զրույցը:

Սակայն երբ Աբովյանը հասկանում է, որ Սիմոնի անդամներն իրեն խոստացել էին ուսման ուղարկել միայն նրա համար, որ հետ կանգնի Պարրոտին հետևելու մտադրությունից, վճռում է թողնել Մայր Աթոռը: Նրա այս քայլը դժկամությամբ է ընդունվում Սիմոնի կողմից, և ինչպես Աբովյանը գրում է. «Սիմոնը, միաբանության ցուցակից ջնջելով իմ անունը, ինձ նզովք կարդաց՝ օրհնության փոխարեն... Վայ նրան, ով դրանից հետո համարձակվեք ինձ նույնիսկ ողջունել: Մութ գիշերին, առանց մի կոպեկի, դուրս եկա վանքից և գիշերն անցկացրի փեսայիս տանը... Ընկերս՝ այժմ Բեսարաբիայում ուսումնական քահանա Մուրը, գաղտնաբար իր փոքրիկ մուշտակն ինձ ուղարկեց» (Խ. Աբովյան, Երկերի լիակատար ժողովածու, հ. VII, էջ 178–179):

Տեղի ունեցած դեպքերի մասին Հովհաննես Դրիմեցին ծածուկ լուր է տալիս Եփրեմ Կաթողիկոսին: Հայրապետը կարգադրում է Աբովյանին անհապաղ տալ արձակման թուղթ, և նույն Դրիմեցու միջոցով ուղարկում է տասը ռուբլի արծաթ և ավելին՝ գիշերը հրավիրում է իր մոտ՝ հրաժեշտի: Աբովյանն այցելում է Եփրեմ Կաթողիկոսին, երբ վանքում բոլորը խոր քնի մեջ էին: Եփրեմ Հայրապետը՝ իբրև սիրող հայր, ընդունում է նրան և տալիս իր օրհնությունը:

Հայրապետի ջերմ խոսքերը անջնջելիորեն դաջվում են Աբովյանի հոգում. «Բուն նահապետական ժամանակների Աբրահամներին նմանվող այդ աստվածային ծերունու արտասուքն ու ձայնը տասնութ տարուց հետո՝ այսօր էլ թափանցում են մինչև սրտիս

խորքը: «Սուտեցիր ինձ, իմ Ռափայել,— ասաց նա ինձ արդար Իսահակի ձայնով, մի այնպիսի ձայնով, որ այժմ էլ ցնցում է իմ անբողջ եությունը,— մոտեցիր ինձ, բարեպաշտ Աբովի սիրասուն զարմ. բարի է քո նպատակը, և արգասավոր՝ քո ուղին, բայց խոստացիր ինձ չմոռանալ հայրենիքը և հայրենի եկեղեցիդ. ահա իմ ողջագուրանքը, ահա իմ օրհնությունը, ահա և քո արձակման գիրը, որ հանում է քեզ ոչ թե քո եղբայրակիցների շարքից, ոչ թե իմ սրտից, այլ ծառայությունից»» (Խ. Աբովյան, Երկերի լիակատար ժողովածու, հ. VII, էջ 179):

Աբովյանը դժվարին կացության մեջ էր. գրեթե բոլորը նրանից երես էին թեքել՝ կյանքի նոր ուղի ընտրելու և Սուրբ Էջմիածնից հեռանալու համար: Սիմոնի անդամներն իրենց ծանր խոսքերով խոցել էին նրա սիրտը, բայց Եփրեմ Կաթողիկոսն իր այս խոսքերով և վերաբերմունքով մեղմացնում է նրա հոգու և սրտի խոր ցավը: Հայրապետի օրհնությանը հաջորդում է նրանց հրաժեշտի պահը. «...դողդոջուն ձեռներով և հայրական սիրով գրկեց ինձ, համբուրեց, իր բարերար աջը տվեց համբուրելու, տվեց նաև արձակման թուղթը, և ես վեր կացա, հեռացա նրանից, որպեսզի նրա սուրբ, երանելի հիշատակը հավիտյանս օրհնեմ» (Խ. Աբովյան, Երկերի լիակատար ժողովածու, հ. VII, էջ 179):

Ստանալով Վեհափառ Հայրապետի հայրական օրհնությունը՝ Աբովյանը 1829 թ. դեկտեմբերի 5-ին հեռանում է Սուրբ Էջմիածնից: Նա անգամ չի այցելում ծնողներին՝ հրաժեշտ տալու՝ պատճառաբանելով, որ չտեսնի նրանց մորմոքն ու արցունքները, թերևս նաև այն պատճառով, որ չլինի թե նրանց նկատմամբ տածած որդիական սիրուց հետ կանգնի իր ընտրած ուղուց:

Այս ամենով հանդերձ հետագայում Աբովյանը Մայր Աթոռում իր անցկացրած տարիների մասին գրում է ջերմությամբ և գնահատանքով. «Էջմիածնում չէր միթե, որ ես իմ կյանքում առաջին անգամ ճանաչեցի աշխարհը, մի աշխարհ, որ չնայած երկայնք



Կուրվիզա Ֆոն Մայրեյ, Խաչատուր Աբովյան, 1831 թ.

միապաղաղ, բայց լի էր բազմազան տեսարաններով, զգայություններով, և՛ սրտակեղեք, և՛ հոգեպարար, և՛ սարսափելի, և՛ հաճելի իրադարձություններով, որ ես ապրել եմ ինը տարեկան հասակից սկսած... Հենց այստեղ էլ ես կազմեցի իմ առաջին ըմբռնումները կյանքի, աշխարհի մասին» (Խ. Աբովյան, Երկերի լիակատար ժողովածու, հ. VII, 175–176):

Ինչպես տեսանք, Աբովյանը տարբեր առիթներով արժևորել է իր կյանքում Եփրեմ Կաթողիկոսի դերն ու նշանակությունը, և այդ հուշերը կարևոր են՝ բացահայտելու նաև Եփրեմ Ձորագեղցի Կաթողիկոսի կերպարը՝ Հայրապետական ծանր ու դժվար ծառայությունից գալու: Մեր առաջ համնում է գործկազուբ հայրը՝ լի բարությամբ և սիրով:

Արամայիս սրկ. ԱՁԻՁՅԱՆ
Մարիամ ՀԱՐՈՒԹՅՈՒՆՅԱՆ

Յակոբ Պատրիարք Նալեան. Ձեռնադրութեան, այսինքն՝ քահանայութեան խորհուրդի մասին

Ձեռնադրութիւնը եկեղեցւոյ մշակուած է, որով ձեռնադրութեան հոգևոր իշխանութիւնը կը պարզուի: Արդ, ձեռնադրութիւնը ըսելով՝ կը զանազան քահանայութիւնը ռասիկ ժողովուրդէն եւ խառնիճաղանձէն: Իսկ մշակուած ըսելով, կ'որոշէ մշակուած չունեցողներէն, որոնք որևէ մէկ ձեռնադրութեամբ մշակուողներէն: Իսկ եկեղեցւոյ ըսելով, կը զանազան ձեռնադրութիւնն ու մշակուած ուրիշ մշակուածներ: Օրինակ՝ Նոյի ժամանակ Աստուծոյ հաշտութեան մշակուած իբրև՝ ծիսական ըսուեցաւ: Արարածի ժամանակ՝ թլփատութիւնը: Երկինքի մշակուածներն են տասներկու կենդանակերպերը: Հիսուսարևելեան պաղ հովը պարզութեան [եղանակի] մշակուած է, արևելեան անպը՝ անձրիի մշակուած, գարնան մշակուած ծառերուն տերևն է, իսկ ձմեռան մշակուած ձիւնն է: Այսպէս ալ եկեղեցւոյ մշակուած ձեռնադրութիւնն է. ատոր համար նախ ըսուեցաւ, թէ ձեռնադրութիւնը մշակուած է:

Սակայն մշակուած տեսակ-տեսակ [զանազան] կ'ըլլայ. եկեղեցւոյ մշակուած ինչպիսի մշակուած ըսուեցաւ: Որովհետև եկեղեցի անունը հրեշտակներուն եւ ընտրեալներուն համար կ'ըսուի, եւ թէև հրեշտակները՝ երկնային քահանայապետութիւններ կ'ըսուին, սակայն, քահանայութիւնը ձեռնադրութեամբ չեն առած, այլ ստեղծմամբ. այդ պատճառով ըսուեցաւ, թէ ձեռնադրութեան հոգևոր իշխանութիւնը կը պարզուի: Քանի որ չար եկեղեցի եւ չարերու ժողով ալ կայ, որ հոգևոր իշխանութիւնը չունի՝ ձեռնադրութեամբ. ատոր համար ըսուեցաւ հոգևոր իշխանութիւն: Որովհետև, ինչպէս Աստուծոյ երկրաւորները երկնաւորներու միջնորդութեամբ կը կառավարէ, այդպէս ալ եկեղեցին քահանայական իշխանութեամբ կը կառավարէ: Արդարև, նախքան քահանայութիւնը գլու-

խին մազը խաչաձև կը կտրուի, եւ գազաթը թագի ու կտր պակի մամն՝ բաց կը ձգուի, մշակուելու համար, թէ՛ բարձրեալ Աստուծոյ կողմէն, որուն ծառայելը թագաւորել է: Ինչհետև, որովհետև եկեղեցականներուն թագաւորութիւնը այս աշխարհէն չէ, ատոր համար մազերը կտրելէն ետք անոր ձեռքը անել կը տրուի, որ կը ցուցնէ, թէ՛ Աստուծոյ տունը ակողը երկինքի մէջ պիտի թագաւորէ, եւ թէ՛ լաւ է Աստուծոյ տունը անել, քան մեղաւորներու յարկերէն մերս բնակիլ:

Ձեռնադրութեան խորհուրդին համար վեց բան անհրաժեշտ է:

Նախ՝ ձեռնադրողը եպիսկոպոս ըլլայ: Երկրորդ՝ միայն, որ է օծունը ու պատշաճաւոր գործածելիքը, որոնք կը տրուին ձեռնադրողին շօշափելու համար:

Երրորդ՝ խօսքին ձեռք: Չորրորդ՝ ձեռնադրողը պէտք է արու ըլլայ, որովհետև կին մարդը ընդունակ չէ ձեռնադրութեան կնիքին:

Հինգերորդ՝ ուղիղ դիտարկութիւն: Վեցերորդ՝ ձեռնադրողը պէտք է մկրտուած ըլլայ:

Արդարև, քահանայութեան կարգն ու աստիճանները եօթն են:

Առաջինը դեռնապանութիւնն է: Դեռնապանին գործն է սրբութեան վայրը պահել ու պահպանել պիղծերէն ու բանադրութեան: Ասիկա Քրիստոս ցոյց տուաւ մեզի, երբ չուանէ խարազանը առաւ եւ անարժան վաճառողներն ու զնողները տաճարէն վնասեց [տես Յովհ. 2. 13–16]:

Երկրորդը ընթերցողութիւնն է: Ընթերցողին գործն է կարդալ մարգարէական գիրքերը: Ասիկա Քրիստոս ցոյց տուաւ մեզի, երբ Եսայի մարգարէին գիրքը բացաւ եւ ոտքի ելաւ ընթերցելու [տես Դուկ. 4. 14–21]:

Երրորդը երդմնեցողութիւնն է: Երդմնեցողին գործն է մկրտութեան եկողները հրաժարեցնել սատանայէն, աղօթքներով դէտրոյ հաւածել դիւհարներէն՝ երդմնեցնելով Տիրոջ անունով: Ասիկա Քրիստոս յայտնեց մեզի՝ դէտրոյ հանելով ու առաքեալներուն ըսելով, թէ՛ հանեցէք դէտրոյ, հիւանդները բժշկեցէք [տես Մատթ. 10. 8]:

Չորրորդը ջահընկալութիւնն է: Ջահընկալին գործը վառած մոմերը ձեռքը բռնելն է: Սուրբ խորհուրդներն ու Աւետարան կարդալու ընթացքին: Վառուած մոմը կը ցուցնէ Աւետարանին լոյսը: Ասիկա Քրիստոս յայտնեց մեզի, երբ ըսաւ, թէ՛ Ես եմ աշխարհի լոյսը [տես Յովհ. 8. 12]. իսկ առաքեալները այն ատեն ջահընկալ ըրաւ, երբ ըսաւ անոնց, թէ՛ որիւք էք աշխարհի լոյսը [տես Մատթ. 5. 14–16]:

Հինգերորդը կիսասարկաւագութիւնն է: Կիսասարկաւագին գործը մուկները առնելն է: Երրորդներէն ու սարկաւագին տալ: Ասիկա Քրիստոս յայտնեց մեզի, երբ մէջքին գօտին կապեց ու լուաց աշակերտներուն ոտքերը [տես Յովհ. 13. 4–15]: Նաեւ, սկիզբ, մազզման, գինիին ամանն ու մշխարը սարկաւագին տալու, ինչպէս նաեւ սեղանին կտորները լուայն ալ կիսասարկաւագին գործն է:

Վեցերորդը աւագ սարկաւագութիւնն է, որու գործը քահանային ծառայելն է եկեղեցւոյ խորհուրդներուն ժամանակ, Աւետարան կարդալ, ողջոյնը քահանայէն առնելով ժողովուրդին տալ: Ասիկա Քրիստոս ցոյց տուաւ մեզի պատարագելու ժամանակ, երբ մարմինն ու արիւնը տուաւ ճաշակելու համար [տես Մատթ. 26. 26–28]. ատոր համար սարկաւագը ժողովուրդին հետ Հաղորդութիւն չի ստանար, այլ՝ Սեղանին վրայ՝ քահանային հետ:

Եօթներորդը քահանայութիւնն է, որ բարձրագոյն կարգն է՝ միւս վեց աստիճա-

նաւորներուն վրայ: Քահանային գործն է սրբազանատուր պատարագը մատուցել, եւ ասիկա քահանային առաջնային գործն է: Ասիկա Քրիստոս յայտնեց մեզի, երբ Վերանաւան մէջ պատարագեց եւ իշխանութիւն տուաւ անոնց [աշակերտներուն] ըսելով, թէ՛ ասիկա Իմ յիշատակիս համար ըրէք [տես Մատթ. 26. 26–28]: Քահանային յաջորդ գործը կապելն ու արձակելն է. կապել մեղքէն չհարձողները, եւ արձակել դարձողները. տակաւին, Քրիստոս ցոյց տուաւ քահանայութեան կարգը Ինքն Իր անձին վրայ՝ խաչին վրայ Ինքզինք պատարագելով: Եպիսկոպոսութիւնն ու հայրապետութիւնը այլ կնիք ու կարգ չեն. այլ՝ եկեղեցւոյ բարձրագոյն իշխանութիւնը, որովհետև քահանայութիւնը թագաւորութեան մասն է, իսկ եպիսկոպոսութիւնն ու կաթողիկոսութիւնը՝ հոգևոր կայսրութեան մասն:

Փականքն ու բանալիները երկուքն են քահանաներուն մօտ. մէկը՝ կարգին, իսկ միւսը՝ գիտութեան բանալին, քանի որ քահանան Ամենակալ Աստուծոյ հրեշտակն է, որ հոգ պիտի տանի միշտ սորվելու եւ սորվեցնելու, որպէսզի բաժնաբաժնի մեղքերը կարենայ զատորոշել ու գանազանել:

Բարի քահանան Աստուծոյ նման է, մարմինով հրեշտակ եւ վերիններուն նման է:

Չար [քահանան] դներուն պէս է՝ լոյսէ զուրկ, հաղորդ է կարգին [աստիճանին], բայց դատարի՝ բարութենէն:

Շարունակելի

«Քրիստոնէական Ուսանելի», 1806

Աշխարհաբարի վերածեց Կարանը (Յակոբ) ՔՐԻՍՏՈՆՅԱՆ

Քրիստոնէությունը և հին ու նոր քաղքենիությունը

← էջ 4

Պողոս առաքյալն էլ է զգուշացնում կյանքը հարստությամբ վայելելու վտանգների մասին. «Իսկ ովքեր հարստանալ են ուզում, ընկնում են փորձության, որոգայթի և բազում անմիտ ու վնասակար ցանկությունների մեջ, որոնք ընկնումն տանում են մարդկանց դեպի կործանում և դեպի կորուստ, որովհետև բոլոր չարիքների արմատը փողոսաբանությունն է, որին ոմանք ձգտելով՝ մոլորվեցին հավատից և իրենք իրենց զգեցին բազում ցավերի մեջ» (Ա. Տիմ. 6. 9–10): Սուրբ Գիրքը հատկապէս զգուշացնում է հարստությունն անօրինությամբ կուտակելու և զեխ կյանքով ապրելու վտանգների, ինչպէս և դրանց հետևող անխուսափելի պատիժների մասին. «Անավասիկ, ձեր դաշտերը մշակած մշակների վարձը ձեզ մոտ պահեցիք. ձեր կողմից զրկվածն աղաղակում է, և հնձվորների բողոքը հասավ Ամենակալ Տիրոջ ականջին: Մեղկ կյանքով ապրեցիք երկրի վրա և շվայտացաք ու ձեր սրտերը պարարտացրիք մորթվելու օրվա համար: Չրկեցիք, սպանեցիք արդարին, որը ձեզ չէր հակառակում» (Հակ. 5. 4–6): Իսկ Չաքարիայի տեսած Թշուղ գերանոր տեսիլքի խորհուրդը հրեշտակն այսպէս է բացատրում մարգարէին. «Դա այն անեծքն է, որ տարածվում է ամբողջ աշխարհի երեսին, որովհետև ամեն գողի մահացում պատիժը դրանով պիտի իրագործվի... պիտի մնա նրանց տանը և պիտի սպառի այն, նրա փայտն ու քարերը» (Չաք. 5. 3–4):

Տերունական աղոթքը, ինչպէս և բազմաբնույթ աղերսանքներից շատերը երբեք չեն օգտագործում «ես» անձնական դերանունը, այլ՝ «մեր»-ը՝ որպէս հավաքականության և սիրոյ դրսևորում: Բանն այն է, որ մարդը հասարակական էակ է և ի գորու չէ հասարակությունից դուրս ապրելու՝ բացառությամբ ճգնաժամների, մենակյացների, որոնք այդ պակասը լրացնում են Աստծոյ երանելի ներկայության վայելմամբ: Իսկ հասարակության մեջ ապրելով հասարակական բարիքները եսասիրաբար լիաձեռն քաղելը ավետարանական՝ իրար սիրելու պատվիրանի խախտումն է՝ հղի հասարակական ներդաշնակության և առողջ միջանձնական հարաբերությունների սասանմամբ և չափա-

զանց վտանգավոր երկպառակություններով կենցաղայինից մինչև քաղաքական: Ընդ որում՝ մարդու քաղքենիացումն սկսվում է հենց կրոնական ճշմարտությունների անտեսմամբ, ինչի հետևանքով մարդիկ հեռանում են լույսից, գիտելիքով հարստանալուց, իրար ծառայելուց, հետևաբար նաև՝ մեր-ից համայնքից, հասարակությունից, ազգից, եկեղեցուց, ապա և՝ հանդուրժողականությունից, մերողամտությունից, մեծահոգությունից, անձնագոհությունից, հայրենասիրությունից՝ կյանքի իմաստն անձնապատասխանաբար միայն սին, երկրային բարիքներ կուտակելը համարելով, թյուր ու կործանարար արժեքային համակարգ ձևավորելով և հուրախություն թշնամիների՝ հեշտ պառակտելով:

Իսկ նրանք, ովքեր հին, նոր, նորագույն ժամանակներում ըմբոստացել և այսօր էլ դեռ ըմբոստանում են եկեղեցու դեմ՝ պատճառն առիթից չտարբերելով, խաբելով իրենց, թէ այդ բանը հանուն դավանանքի, գաղափարախոսության, գիտության կամ ինչ-ինչ այլ բաների են անում, պետք է ճիշտ հետևություն անեն Ն. Բերդյաևի վերոբերյալ հոդվածի եզրափակիչ խոսքից. «Առջևում երկու ճանապարհ ենք տեսնում՝ իրար թշնամի երկու հակադրույթն ու լուրջ մի կողմից՝ մարդկային ինքնաստվածացում և ինքնագոհություն, այս աշխարհի բարիքների պաշտամունք և համընդհանուր դիմագրկում, մյուս կողմից՝ ճշմարիտ Աստծուն ծառայություն, երկրայինը երկնայինի, ժամանակավորը հավերժականի հետ միավորում, անձի հաստատումն իր բացարձակ կոչմամբ»:

Աստվածաշնչի ուսուցմամբ՝ հարստությունը ոչ միայն վնասակար է, եթե հպարտացնում է մարդուն, զեխ ու շվայտ կյանքի պատճառ հանդիսանում, դառնում կյանքի միակ իմաստը, այլև ստրկացնում է, ինչպէս ասում է Ս. Գերոնիմոսը. «Ով ստրկանում է հարստությանը, պահպանում է այն, ինչպէս ստրուկը, իսկ ով թոթափել է իր ուսերից այս ստրկական լուծը, նա տնօրինում է դրան տիրոջ օրինակով»: Իսկ այս նույն հարստությունը, եթե ճիշտ ձեռքբերում է և աստվածահաճ խորհուրդով է կիրառվում, երանվում է բազում օրհնություններով՝ որպէս սիրո

բարձրագոյն դրսևորում հասարակության նկատմամբ, որպէս Քրիստոսի՝ իրար սիրելու պատվիրանի կատարում (Յովհ. 13. 34):

«Երանի՛ նրան, ով մտածում է աղքատի և տնանկի մասին. փորձանքի օրը Տերը կփրկի նրան: Տերը կփրկի ու կպահպանի նրան, երանելի կդարձնի երկրի երեսին և չի մատնի նրան իր թշնամիների ձեռքը: Տերը նրան կօգնի տառապանքի մահճում և նրա անկողինն ամբողջովին կմաքրի իր հիվանդությունից» (Սաղմ. 40. 2–4, տես նաև Մատթ. 5. 7, Ա Տիմ. 6. 17–19):

Այսօր աշխարհում իշխում է սպառնողական գաղափարախոսությունը՝ ավանդական ընտանեկան, ազգային և հոգևոր արժեքների մերժմամբ, և մոլորեցնում «քաղցր կյանքի» գաթակղիչ խոստումներով, բայց իրականում մարդ արարածին մատնում մեծության՝ լավագույն դեպքում ծերանոցում մահը դիմավորելու հեռանկարով: Այն, որ շնորհի ու կատունների և այլ կենդանիների ընկերակցությունն է ժամանակակից մարդու ընտանիքի փոխմայրությունն ու միակ մխիթարությունը դառնում, այն, որ զարգացած երկրներում ինքնասպանությունների և ընկճախտների ու հոգեկան ուրիշ խանգարումների միջին վիճակագրականը գերազանցում է ավանդապահ երկրների մամորիմակ ցուցանիշները, որքան ցավալի, նույնքան էլ օրինաչափ երևույթ է այս գիտակցության կրողների համար: Իսկ այն, որ այս աշխարհը Աստվածաշնչում կոչվում է «ստրտության հովիտ» (Սաղմ. 83. 7), պատահական չէ՝ աղանական մեղքով պայմանավորված տառապանքի ու մահվան մատնված մարդկության խորհրդով, մարդկություն, որի սիրտը նախածնողների մեղանշմամբ խաթարվեց, մարդու մեջ մանկությունից հաստատվեց մեղքի և չարի նկատմամբ հակումը, ինչն էլ իր հերթին, Կայնի ձեռամբ իր եղբայր Աբելի սպանությունից ի վեր պատճառ դարձավ ազգամիջյան և քաղաքացիական անվերջանալի պատերազմների, ընտանեկան և հասարակական խժժությունների, հարստահարությունների և իրար ստրկացնելու, բարիքների և ազդեցության ոլորտների վերաբաշխման համար անողորմ պայքարի:

Ընդ որում՝ մի բան է քաղքենիության դրսևորումը խաղաղ ժամանակներում, մի այլ բան՝ օրհասական պահերին:

Սուրբ Գիրքը պատվիրում է սիրել իրար, հարգել, հոգ տանել մեկը մյուսի հանդեպ մեծահոգությամբ և անձնագոհությամբ, ինչպէս Քրիստոս, հանուն մարդկության փրկության, չարչարվեց և խաչի վրա մահն ընդունեց. «Ավելի մեծ սեր ոչ ոք չունի, քան այն, որ մեկն իր կյանքը տա իր բարեկամների համար» (Յովհ. 15. 13):


Գիրք գրոցում անձնագոհության՝ որպէս սիրո բարձրագոյն դրսևորման բազմաթիվ այլ դրվագներ էլ կան, ինչպէս՝ գեղեցկուհի Յուդիթի և Եսթեր թագուհու արարքները, որոնք ժողովրդի օրհասական պահին, մահն աչքի առջև ունենալով, հերոսություն գործեցին և իրենց անունները հավերժացրին պատմության մեջ: Ուրիշ այլ բազմաթիվ հերոսների անուններ էլ կան և՛ Աստվածաշնչում, և՛ Վարք սրբոցներում, և՛ Հայոց ու համաշխարհային պատմության ու գրականության էջերում, ինկելի անուններ, որոնց անձնագոհության շնորհիվ փրկվում են ազգերը և նրանց միլիոնական ժառանգությունները:

Աստված շարունակ հոգ է տանում մեր մասին, զորացնում ու մխիթարում մեզ, անձանձի շնորհներ պարգևում: Եվ հենց այդ զորություններով էլ կարող ենք հաղթահարել մեր մեղքերն ու մոլորությունները, շտկել սխալներն ու ձեռքազատվել մոլորություններից, այդ թվում նաև՝ դժվարճանաչելի հոգեկործան քաղքենիության ճահճից, քանզի չարիքը հենց դա է՝ մեր տգիտությունը, մեր ծուռ արժեքային համակարգը: Իսկ Աստծո օգնությամբ թոթափելով այդ ամենը՝ մինչև իսկ կարող ենք մեր իսկ ձեռքերով մեր բաղձալի երկիրը կառուցել՝ այլ երկրներում ապրել երազելու փոխարեն, և այս աշխարհում ոչ միայն իրական խաղաղություն, այլև բարօրություն գտնել: «Եթե Իմ ժողովուրդը, որի վրա Իմ անունն է դրված, զղջա, աղոթի և Իմ երեսը փնտրի ու հետ դառնա իր չար ճանապարհներից, Ես էլ երկնքից կլսեմ, կներեմ նրանց և կբուժեմ նրանց երկիրը» (Բ Մնաց. 7. 14):

Գրիգոր ԴԱՐԲԵՆՅԱՆ

Հովհաննես Թումանյանի կյանքի ուշագրավ էջերից

Նովհաննես Թումանյանի մասին հուշագրական զգալի ժառանգություն է ստեղծված: Առանձնանշելի են «Թումանյանը ժամանակակիցների հուշերում», Ն. Թումանյանի «Հուշեր և գրույցներ» գրքերը: Թումանյանի մասին հուշեր առկա են նաև նրա ժամանակակիցների նվիրված հուշապատումներում («Ղազարոս Աղայանը ժամանակակիցների հուշերում», «Վահան Տերյանը ժամանակակիցների հուշերում», «Ռոմանոս Մելիքյանը ժամանակակիցների հուշերում» «Մեծերը մեծերի մասին» գրքում և այլն): Օրինակ՝ հուշագիրներ Մ. Նարյանը, Ռ. Լուսինյանը, Վ. Բալյանը, Զ. Պողոսյանը, Բ. Ջանյանը, Լ. Հախվերդյանը «Ավետիք Իսահակյանը ժամանակակիցների հուշերում» գրքի տարբեր էջերում Իսահակյանի դիմանկարին զուգահեռ ներկայացնում են Յ. Թումանյանի դիմանկարի որոշ նրբերանգներ: Բանաստեղծի մասին ուշագրավ հիշողություններ կան նաև Մ. Թումանյանի «Իմ համառոտ կենսագրությունը և իմ հիշողությունները» գրքում և Գ. Մահարու «Պատանեկություն» վիպակում: Թումանյանը բնորոշ կերպավորվում է նաև հարազատների, գրողների, մտերիմների ու գործընկերների նամակներում և օրագրերում: Նշենք, որ հուշագրության որոշ բնագրեր հյուսվում են երկու անձերի շուրջ ևս. օրինակ՝ Մ. Աղայանի «Ղազարոս Աղայանը ու Հովհ. Թումանյանը» հուշագրությունը:



Եր. Իսաբեկյան. Հովհաննես Թումանյան, 1956 թ.

Թիֆլիսում, Էջմիածնում, Դսեղում, Վանում և այլուր: Գործողությունները հաջորդում են միմյանց, որոնց կենտրոնում Թումանյանն է, և որոնք դառնում են բանաստեղծի դիմանկարի ձևավորման մյուս տարրերը: Հետաքրքրական է և նույնիսկ կարևոր, թե հուշագիրը էր և որտեղ է հանդիպում բնորոշին: Այս դեպքում տարածաժամանակային ընդգծումը նորովի է բացահայտում մարդ, բանաստեղծ, ազգային-հասարակական գործիչ Յ. Թումանյանին: Այսպես. բանաստեղծին ներկայացնելով թիֆլիսյան միջավայրում՝ հուշագիրն անդրադառնում է նրան՝ ոչ միայն իբրև Հայ գրողների ընկերության նախագահի, այլև ժողովուրդների բարեկամության ջատագույնի, ազնիվ մարդու, սիրառատ հոր, նվիրյալ ընկերոջ, սկզբունքային հայի: «Թումանյանը կենտրոնական դեմք էր Թիֆլիսի մտավորական շրջաններում...» գրում է Գ. Լևոնյանը:— նրա մոտ լինում էին զանազան ուղղությունների և քաղաքական համոզմունքների տեր մարդիկ. նա հեղինակություն էր վայելում ոչ միայն հայ, այլև վրաց գրական շրջաններում...» (ԹԺՀ, 445):

Հուշերից տեղեկանում ենք, որ 1908 թ. երգահան Ռոմանոս Մելիքյանը Թիֆլիսում զբաղվում է մանկավարժական գործունեությամբ, հանդիպումներ ունենում հայ մտավորական աշխարհի ներկայացուցիչների հետ, կազմակերպում երաժշտագետների մի խմբակ՝ «Երաժշտական լիգա» անունով: Խմբակի ծնունդը ողջունում է Ամենայն հայոց բանաստեղծ Հովհաննես Թումանյանը: Ամենուհանի էին նրանց հանդիպումները՝ ծիծաղակալից զուրկ զրկվածներով լի: Թումանյանը նույնիսկ կազմակերպում էր հայտնում ընդունվելու երաժշտական այդ խմբակը՝ ստանալով Ռ. Մելիքյանի օրհնությունը: Այցելելով Դսեղ երգահանը Յ. Թումանյանի հետ շրջել է Լոռվա աշխարհում, այնտեղից ոտքով հասել Դիլիջան և ժողովրդական երգեր ժողովել (տես Ռոմանոս Մելիքյանը ժամանակակիցների հուշերում, Ե., 1977):

Թումանյանը շատ էր ծանրաբեռնվում հասարակական գործերով՝ հատկապես Գրողների ընկերությունում: Նա պարբերաբար գրական երկերիցներ և աշուղների մրցումներ էր կազմակերպում: «Այնպես պիտի անեն, — գրում էր Թումանյանը, — որ Թիֆլիսի և ողջ Հովհանի հայությունը ծանաչի ու սիրի մեր գրականությունը...», որ Սայաթ-Նովայի տարեդարձին գրողները ծաղկեփնջերով շքերթ կազմեն դեպի նրա շիրիմը ու վարդերով զարդարեն վարդերի սիրահար մեծ աշուղի գերեզմանը» (ԹԺՀ, 407—408):

Հուշերում բնութագրվում է Մեծ լռեցու բանավոր խոսքը. Թումանյանը խոսքի մեծ վարպետ էր. «Բանավոր Թումանյանը մի քանի հասակով ավելի բարձր էր, քան գրավոր Թումանյանը: Նրա խոսքի պարզությունը բխում է մտածման պարզությունից» (ԹԺՀ, 138—139):

Յ. Թումանյանը եղել է առակներ, անեկդոտներ պատմելու վարպետ. «Ասում էր, խոսում, կենացներ խմում և ամեն կենացի ու առիթի զանազան դեպքեր, անեկդոտներ պատմում» (ՆԹՀԵՎՁ, 43): Նա Լոռվա գյուղացիների կյանքից շատ սրախոսություններ, կատակներ է հյուսել, նույնիսկ որոշել է դրանք տպագրության հանձնել: Մ. Հովհաննիսյանը «Մեր Ուհանեզը» հուշագրության մեջ ներկայացնում է լռեցի և աշտարակի հնձվորների անեկդոտի Յ. Թումանյանի տարբերակը. «Դսեղ, Օձուն, Մարց, Ազարակ, Բերդ Ամրակից, Գյուլագարակ: Այստեղ Հովհաննեսը ավելացրել է «Ամանը դատարկ», այսինքն՝ լռեցին ոչ միայն յոթ գյուղի անուն է

տալիս շուտ-շուտ, այլև հենց ասելու ժամանակ էլ մածունն ուտում է» (ԹԺՀ, 260):

Նկարագրություններում բանաստեղծի ուղղակի խոսքերի հիման վրա հուշագիրները տալիս են Թումանյանին բնորոշ սեղմ բնութագրություն, որ հետագայում ձեռք է բերում շրջասական արժեք: Օրինակ՝ «խոսքի և գրույցի կախարհ» (էջ 114), «բերանացի պատմությունների գուսան» (էջ 87), «թամաղա ամենայն հայոց» (էջ 452), «գրչի մեծ վարպետ» (էջ 449), «հայոց մեծ վշտի երգիչ» (էջ 129), ««ձեռագ» (քսարոմտ) գրող» (էջ 293) և այլն:

Յ. Թումանյանին նվիրված գեղարվեստական վավերագրության խոսքաշարը կառուցված է նաև հեզանքի դրսևորումներով: Հեզանքը գրողի հուզական վերաբերմունքի արտահայտություն է. «Երբ դասախոսությունը վերջանում է, Թումանյանն ասում է մի կարճ խոսք խորագույն հեզանական ժայտով.

— Ես կարծում էի, որ ես Պոլիսը չեմ ճանաչում, բայց բանից դուրս է գալիս, որ Պոլիսն էլ ինձ չի ճանաչում» (ԹԺՀ, 149):

Հուշագրության էջերում Ամենայն հայոց բանաստեղծը հանդես է գալիս նաև որպես ընտանիքի հայր և դաստիարակ: Նա իր գավակներին խորհուրդ էր տալիս, որ յուրաքանչյուրն իր համար հիշատակարան պահի և տպավորությունները կյանքից ու կարգացած գրքերից ամեն օր գրի առնի: 1901 թ. Ուրախվելից նա գրում է. «Սիրելի Մուշեղ, Աշխեն և Նվարդ, ձեր հիշատակարաններն այնքան կարճ են, որ ավելի շուտ մոռացարաններ են, քան թե հիշատակարաններ: Ամենից լավը Նուրիկին էր, որ կորել էր... Ես երևակայում եմ, թե ինչքան բաներ կային մեզը գրած: Դուք հիշատակարան գրել չգիտեք: Որ գնում եք մի տեղ, մայեցեք, թե ինչն է ամենից ավելի ձեր ուշադրությունը գրավում մարդիկ, բնությունը, բնության ինչ տեսակ լինելը, մարդկանց ինչ տեսակ կյանքը, մի խոսքով, ամեն բան, ինչ որ ձեզ վրա տպավորություն է անում՝ ուրախ թե տխուր, ամեն բան պետք է նշանակեք» (ՆԹՀԵՎՁ, 22):

Անուղղակի ձևով են հյուսված Վախթանգ Ամանյանի հուշերը Յ. Թումանյանի մասին: «Երեմյակ դրոշակակիրը» հուշագրության մեջ հեղինակը ներկայացնում է հոր պատմությունները. «Առանձնապես մոտ էինք Դսեղի սարվորներին: Հայրս հաճախ էր խոսում այն բարեկամական կապի մասին, որ շատ հնուց եղել է Թումանյանների և Ամանյանների մահապետական ընտանիքների միջև: Նրանք իրենց գյուղում էին ազդեցիկ, մշակավոր օջախ, մերոնք՝ մեր գյուղում: Վարդավառի տոնին կամ մերոնք էին յոթ եղբայրներով, ձիերը հեծած, մեծ թափով ու շուքով հյուր գնացել Դսեղի սարը, կամ Հովհաննես Թումանյանի ավագ եղբայրներն են մերոնց հյուր եկել» (Վախթանգ Ամանյան, Հուշագրություններ, Ե., 1984, էջ 309—310):

Հայտնի է, որ Թումանյանը երկու անգամ 1914-ի նոյեմբեր—դեկտեմբերին և 1915-ի հունիսին, եղել է Արևմտյան Հայաստանում, տեսել հայ ազգի ողբերգությունը: Առաջին անգամ հայոց բանաստեղծը՝ իբրև Ազգային բյուրոյի կենտրոնական կոմիտեի անդամ, Շիրվանզադեի, Ներսիսյան դպրոցի տեսուչ Հովսեփ Խունուցի և հոգևոր այլ այրերի հետ մեկնում է ռազմաճակատ՝ պարզելու ճշմարտությունը ռազմի դաշտ կամավոր մեկնած հայորդիների մասին. պատվում էին ստահող լուրեր, թե ռուսական բանակում կռվող հայ կամավորները զբաղված են կողոպտելով և սպանում են թուրք և թուրք խաղաղ բնակիչներին (Թումանյանի՝ Արևմտյան Հայաստան կատարած ճանապարհորդության մանրամասները տես Յ. Թումանյան, Երկերի լիակատար ժողովածու, հ. 8, Ե., 1997, նաև՝ Լ. Կարապետյան, «Հովհաննես Թումանյանի հասարակական գործունեությունը», Ե., 1992, էջ 96—174): Գնապարհորդության մասին կա երկու աղբյուր. մեկը Թումանյանի ծոցատետրերն են, մյուսը՝ Շիրվանզադեի «Պատերազմի վայրերում» ակնարկը: Ն. Թումանյանը մշտն էր, որ հայոց մտադրություն է ունեցել «այդ օրագրի հիման վրա գրել ու հրատարակել իր ուղեգրությունները» (Ն. Թումանյան, Հուշեր և գրույցներ, Ե., 2009, էջ 121), սակայն չի արել համոզված, որ ճշմարիտ և անկեղծ տպավորությունները չեն տպագրվի, իսկ սուտ ու թողարկված փաստեր ինքը չի կարող ներկայացնել:

Սույն հոդվածի տիրույթից դուրս է Թումանյանի վերը հիշատակված ճանապարհորդության մանրամասներին անդրադառնալը: Սակայն մշտն էր պարզապես համար շատ անհասկանալի հարցեր պարզվում են, երբ դարձյալ Ազգային բյուրոյի հանձնարարությանը Թումանյանը Վանի ազատագրումից մեկ ամիս անց լինում է այնտեղ:

Վանից վերադառնալուց հետո՝ հուլիսի 23-ին, մամուլի էջերում հայտնվում են լուրեր այն մասին, որ Վանից, Ալաշկերտից և այլ բնակավայրերից դեպի Իգդիր և Էջմիածին են գալիս մեծ թվով գաղթականներ: Հուլիսի 29-ի գիշերը Թումանյանը մեկնում է Էջմիածին: Սարսափելի տեսարան էր ներկայացնում պատմական այս սրբավայրը: Գերմարդկային ջանքեր ու ներքին ուժ, ինքնամոռաց մարդասիրություն էին պահանջվում յուրաքանչյուր մեկից, ով փորձում էր ինչ-որ բանով օգնել թշվառ ու անօգ գաղթականներին: Նրանց մեջ առաջին գծում Թումանյանն էր, որ անձնուրաց անում էր ամեն ինչ՝ փոքրիշատե թեթևացնելու անօթևան ու հայրենազուրկ մարդկանց տառապանքները: Այդ օրերի մասին Անդրանիկը գրում է՝ Թումանյանը «իր տունը, իր ընտանիքի վայելքները թողուցած, եկավ իր երկու չափահաս աղջիկներուն հետ Էջմիածին, Իգդիրի և Երևանի փողոցներուն և վանքի պատերուն տակ խոնաված գաղթականներուն օգնելու...» (ԹԺՀ, 551):

1915 թ. հոկտեմբերի 21-ին «Լումա» մեկօրյա թերթի առաջին համարում տպագրվում է «Հիշողություններ Էջմիածնի որբանոցից» նյութը, որտեղ ամիսն տառապանքների բովով անցած բանաստեղծը, մեկ-մեկ վերապրելով, հիշում է Էջմիածնի որբանոցում հավաքված մինչև տասը հազար երեխաներին. «Ես էլ նրանցից մեկն եմ, որ ես երեխաների մեջն էի, բայց երբ էսօր մտտում եմ ու աշխատում եմ վերհիշել, կարծես թե նրանց՝ երեխաներին չեմ տեսել: Չեմ տեսել, չեմ ճանաչել առանձին-առանձին: Սաստիկ ծանր էր նրանց հետ խոսելն ու խոսեցնելը... Եթե խոսել ու խոսեցրել եմ, էն էլ շատ քիչ, պատահմունքով... Սակայն շարունակալի աչքիս առաջն է նրանց բազմությունը, նրանց վտիտ, քաղցած ու մերկ բազմությունը...» (Յ. Թումանյան, Երկերի լիակատար ժողովածու, հ. 7, Ե., 1995, էջ 179—180):

Այդ օրերի մասին հիշատակում է նաև Գ. Մահարին. «...Եկավ Հովհաննես Թումանյանը և շրջապատեց իրեն որբերով. ես նրան գիտեի. այդ նա է, որը գրել է «Մի կաթիլ մեղրը», «Շունն ու կատուն»: Նա հագել էր սպիտակ շորեր և դրել էր կեպի: Կեք թթվ, սպիտակ ընչացքով, խաղաղ դեմքով կանգնեց նա, լուռ մայեց բոլորին, հետո մայեց հեռու և հեռացավ» (ԳՄԵՇ, 403): Հուշագրության լեզվատիրությունը թերևս Ամենայն հայոց բանաստեղծ շրջասույթի ձևավորման հիմքերն են նախանշված:

Ամշուշտ, չենք կարող շրջանցել այն փաստը, որ գաղթականության հիմնական պատասպարանը եղել է Էջմիածինը, որը դարձրել էր Թումանյանի հայ ժողովրդի համար, ինչը զմայատելի են ժամանակի առաջադեմ գործիչներն ու մտավորականները: Բացառություն չէր նաև Թումանյանը: Նա իր ողջ կյանքում մեծապես առնչվել է հոգևորականության հետ:

Տարագիր և հայրենազուրկ հայության հավաքատեղի Էջմիածնում են կայացրել հայոց երկու մեծերի՝ Յ. Թումանյանի և Գևորգ Ե կաթողիկոսի հանդիպումն ու հայտնի երկխոսությունը: Այս առումով կարևորվում են ժամանակակիցների հուշագրական պատումները՝ Նվարդ Թումանյան, Աշոտ Պատմագրյան, Վահան Թոթովեց, Ստեփան Զորյան, Վարդգես Ախրոնյան և այլք:

«Ամենայն հայոց բանաստեղծ» պատվանունը այն եզակիներից է, որ ձևավորման օրվանից սկսած մինչև մեր ժամանակները եղել և մնում է ամենասիրելին, և գրեթե չկա որևէ հայ մարդ, որին ծանոթ չլինեն այս շրջանույթն ու այն կրող բանաստեղծը:

Ն. Թումանյանը գրում է. «Սրտաբաց խառնվածք էր հայրիկը և ուզում էր, որ ուրիշներն էլ այդպես լինեին. «Աշխարհիցին ու մարդուն նայել բարի սրտով ու պայծառ հայացքով» (ՆԹՀԵՎՁ, 84):

Հարեթի սերնդաբանությունը

← էջ 5

Ծննդոց գրքում Հարեթին վերագրվում են յոթ որդի՝ Գոմեր, Մագոզ, Մադա, Հավան, Թորեյ, Մեսեք և Թիրաս: Հրեա պատմաբան Հովսեփոս Փլավիոսի «Հրեական հնախոսություններ» աշխատության մեջ (I.VI.122) նշվում է. «Նոյի որդի Հարեթն ուներ յոթ որդիներ. նրանք բնակություն հաստատեցին այնպես, որ սկսած Տավրոս և Ամանոս լեռներից՝ շարունակեցին Ասիայի երկայնքով մինչև Թամարիս (Դոն) գետը և Եվրոպայի երկայնքով՝ մինչև Կադիզ (Եսպանիայում)՝ իսպանական քաղաք): Բնակվելով այն հողերում, որոնց վրա նախկինում ոչ ոք չէր բնակվել, ազգերը կոչեցին իրենց անուններով»:

17-րդ դարում թալմուդյան ռաբբինների կողմից գրված «Սեֆեր Հայաշար»-ում («Հաշերի գիրք») Հարեթի թոռներին վերագրում են որոշ նոր անուններ, որոնք չկան Հին Կտակարանում, և ներկայացվում է շատ ավելի մանրամասն տոհմաբանություն: Հրեական ավանդապատումներում Աբրահամի կինը՝ Քեթուրան, երբեմն համարվում է Հարեթի ժառանգ:

Ք. հ. 7-րդ դարում իսպանացի արքայազնուհի Գիտանական, «հին աշխարհի վերջին գիտնական» համարվող Իսիդոր Սևիլացին գրեց իր հայտնի հանրագիտարանային պատմական տրակտատը՝ «Ստուգաբանություն» (Etymologiae) վերնագրով, որտեղ նա Եվրոպական ժողովուրդների մեծ մասի ծագումը հետազոտում է մինչև Հարեթ: Գրեթե Եվրոպական բոլոր ազգերի գիտնականները մինչև 19-րդ դար շարունակել են կրկնել և զարգացնել Իսիդոր Սևիլացու պնդումը՝ Եվրոպացիների՝ Հարեթից ծագելու մասին:

Անգլիայի ազգային բանաստեղծ, դերասան-դրամատուրգ Վիլյամ Շեքսպիրի «Հենրի IV» պիեսի երկրորդ մասը պարունակում է հեզնական մեկնաբանություն այն մարդկանց մասին, որոնք պնդում են, որ ազգակցական կապ ունեն թագավորական ընտանիքների հետ: Արքայազն Հալլը նշում է նման մարդկանց մասին. «...նրանք կամ մեզ ազգակից կլինեն, կամ էլ Հարեթից առաջացած կլինեն» (II.ii 117–118):

Վրացի պատմաբան և լեզվաբան Իվանե Ջավախիշվիլին (1876–1940 թթ.) Հարեթի որդիներին կապում է որոշակի հին ցեղերի՝ թուրքերի (թաթարներ, հունարեն՝ տիբարեն) և մեշեթների (մեշեթներ/մոսոխներ, հունարեն՝ մոսկո) հետ, որոնք պնդում էին, որ ներկայացնում են ոչ հնդեվրոպական և ոչ սեմական, հնարավոր է «նախաբերական» ցեղերին, որոնք բնակվել են Անատոլիայում Ք. ա. 3–1-ին հազարամյակներում:

Լեհական սարմատիզմի ավանդազրույցներում սարմատները, որոնք իրանական ժողովուրդ են, համարվում էին Նոյի որդի Հարեթի սերունդը, ինչը թույլ էր տալիս լեհ ազնվականությանը հավատալ, որ իրենց ծագումը կարող է ուղղակիորեն կապված լինել Նոյի հետ: Շոտլանդացի ժողովուրդի՝ Հարեթից սերված լինելու մասին պատմությունը հրատարակել է Ջորջ Չալմերսը «Կալեդոնիա» աշխատությունում 1807–1824 թվականներին:

Իսլամական ավանդույթում Հարեթը սովորաբար համարվում է Գոզ և Մագոզ ցեղերի նախնին: Իսլամական ավանդույթը նաև հակված է Հարեթի սերունդներին նույնականացնել թուրքերի, խազարների, չինացիների, մոնղոլների և պավոնների հետ: Ըստ Աբու-Բազի, որը գրել է 17-րդ դարի ազգագրական տրակտատը՝ «Շաջարա-ի Տարակիմա»-ն («Թուրքմենների տոհմաբանություն»), Քամի սերունդները զնացել են Աֆրիկա, Մեմինը՝ Իրան, իսկ Հարեթինը՝ Իտիլ (Վոլգա – Եվրոպայի ամենաերկար գետը) և Յախ (Ուրալ) գետերի ափերը:

Հարեթի ավագ որդին Գոմերն էր՝ Աքբանասի, Ռիվաթի և Թորգոմայի հայրը: Գոմեր անվանումը Հին Կտակարանում հիշատակվում է նաև Եգեկիելի գրքի 38:6-ում՝ որպես Գոզի Մագոզ երկրի առաջնորդի դաշնակցի:

Հովսեփոսը Գոմերին և «գոմերացիներին» տեղակայել է Անատոլիական Գալաթիայում. «Քամի Գոմերը հիմնադրել է նրանց, որոնց հույները հիմա անվանում են գալաթացիներ, բայց այն ժամանակ կոչվում էին գոմերացիներ»: Գալաթիան, ըստ էության, իր անունն ստացել է հին գալերից

(կելտերից), որոնք բնակություն են հաստատել այնտեղ: Սակայն ավելի ուշ շրջանի քրիստոնյա գրող Հիպոլիտոս Հռոմեացին մոտ 234 թ. Գոմերին համարել է կապադոկացիների՝ գաղատացիների հարևանների նախնին: Հերոնիմոսը (մոտ 390), Իսիդոր Սևիլացին (մոտ 600) նույնպես հետևել են Հովսեփոսի կողմից Գոմերի՝ գաղատացիների, գալերի և կելտերի հետ նույնականացմանը:

Ըստ հայերի ծագման վրացական ավանդազրույցի՝ հայերի նախահայր Հայկը, վրացիների նախահայր Քարթլոսը և կովկասյան մի քանի այլ ցեղերի նախահայրերը եղել են եղբայրներ՝ սերելով մի հորից՝ Թորգոմից: Թորգոմը՝ Գոմերի որդին, հայ ազգի հիմնադիր Հայկ նահապետի հայրն էր, Հայոց անվանադիր նախնի Հայկի հայրը: Եգեկիել մարգարեն հիշատակում է վաճառաշահ «Թորգոմատունը» (Աստվածաշնչի հայերեն թարգմանության մեջ՝ «տուն Թորգոմայ»), որը Տյուրոս քաղաքի վաճառանոցը լցնում է ձիերով ու ջրիներով. «Թորգոմայի տնից քեզ մոտ ձիեր, մոսյագներ և ջրիներ էին բերում քո առևտրի ապրանքի դիմաց» (27:14): Աստվածաշնչի հին մեկնիչները «տուն Թորգոմայ» կամ «Թորգոմական աշխարհ» ասելով հասկացել են գլխավորապես Հայաստանը: Բաբելոնի աշտարակաշինությունից և լեզուների բաժանումից հետո Թորգոմը որդիներով և իր ամբողջ ժողովուրդով հեռանում է Բաբելոնից և բնակություն հաստատում Մասիս և Արագած լեռների միջև: Սակայն շուտով Թորգոմի ժողովուրդը բազմանում է, և տարածքը, որտեղ բնակվում էին, չի տեղավորում նրանց, ինչի պատճառով էլ նրանք ընդարձակում են իրենց բնակության սահմանները՝ Սև ծովից մինչև Կասպից ծովը ու Կովկասյան լեռները: Թորգոմի որդիները իրենց հոր մահից մի քանի տարի անց ապստամբություն են բարձրացնում բռնակալ Նեբրովի դեմ և մարտում սպանում նրան: Նեբրովից հաղթելուց հետո դուրսգալով եղբայրներն սկսում են հանգիստ և անկախ կերպով իշխել իրենց երկրներում փոխարձակաբար օգնելով միմյանց:

Հարեթի երկրորդ որդին Մագոզն էր: Եգեկիելի գրքում նշվում է, որ Մագոզի հեթանոս ժողովուրդն ապրում էր «աշխարհի հյուսիսում» և փոխաբերաբար ներկայացնում է չարի ուժերը, ինչն այն կապում է ապոկալիպտիկ ավանդույթների հետ: Մագոզի երկրի մասին Եգեկիելի մարգարեություններում (38–39-րդ գլուխներ) Գոզն ու Մագոզը փոխկապակցված են հիշատակվում: Նոր Կտակարանում այս գույգին հանդիպում ենք Հայտնություն 20:7–8-ում («Երբ հազար տարին լրանա, սատանան իր բանտից պիտի արձակվի և պիտի դուրս գա, որ մոլորեցնի երկրի չորս անկյուններում գտնվող ազգերին, Գոզին ու Մագոզին»: Նա նրանց պատերազմի պիտի հավաքի, որոնց թիվը ծովի ավազի չափ է»), և այս դեպքում նրանք կարող են պարզապես լինել Աստծո նախատիվ պայմանների փոխաբերություններ: Հովսեփոսը Հարեթի որդի Մագոզին անվանում է սկյութների կամ Սև ծովից հյուսիս գտնվող ժողովուրդների նախահայր: Նրա խոսքով՝ հույները Սկյութան անվանում էին Մագոզի: Եգեկիել 38-ում ցեղային անունների թվարկման հերթականության ուսումնասիրությունից բխող այլընտրանքային նույնականացման համաձայն՝ Մագոզը պետք է որ տեղորոշվի Կապադոկիայի և Մարաստանի միջև: Ռաբբի Շլոմո Գանցֆրիդի (19-րդ դար) խոսքերով՝ Մագոզը վերաբերում է մոնղոլներին: Նա մեջբերում է արաբ գրողի, որը Հինական Մեծ պարսպին անվանում է «Մագոզ»:

Աստվածաշնչագետները, ընդհանուր առմամբ, Նոյի երրորդ որդի Մադային նույնացնում են շատ ավելի ուշ շրջանի գրառումներում համդիպող իրանցի մարերին: Մարացիները, որոնց Հովսեփոսը և հետագա գրողները մեծ մասը համարում են Մադայի սերունդները, հայտնի էին նաև որպես Մադա, այդ թվում՝ ասորական և եբրայերեն աղբյուրներում: Մադայի հետ կապված է նաև իրանական Համադան քաղաքը: Ենթադրյալ կապ կա նաև հունական Մեդոսի

և Մեդեայի հետ: Մեդոսը և նրա մայրը՝ Մեդեան, դասական հունական դիցաբանական պատմության մեջ նույնպես համարվում էին մարերի նախնիներ: Քրիստոնյա գիտնականները առաջարկել են եբրայական Մադայի և հունական Մեդոսի կապը դեռևս Իսիդոր Սևիլացու ժամանակներից (Etym. 9.2.28):

Հարեթի չորրորդ որդին Հավանն էր: Նրա անունը, ընդհանուր առմամբ, կապվում է հին հույների և Հունաստանի հետ (հմմտ. Ծննդ. 10:2, Դան. 8:21, Չաք. 9:13 և այլն), նրա որդիների անունները (ինչպես նշված է Ծննդոց 10-ում) սովորաբար կապվում են Հյուսիսարևելյան Միջերկրական ծովի և Անատոլիայի վայրերի հետ՝ Եդիսա (Կիպրոս), Թարսիս (Տարսոնը Կիլիկիայում, բայց 1646 թվականից հետո հաճախ նույնացվում է Իսպանիայի Տարսետոսի հետ), Կիտիս (նաև Կիպրոս) և Դոդանիս (այլ կերպ՝ Ա Մնաց. 1:7-ում «Ռոդանիս»): Հռոդոս կղզին, որը գտնվում է ժամանակակից Թուրքիայից արևմուտք՝ Կիպրոսի և Հունաստանի միջև:

Հարեթի որդիներից հինգերորդը Թորեյն էր, որ ավանդաբար, ըստ առաջնային աղբյուրների, համարվել է կովկասյան իբերացիների (վրացիների նախնիների) հայրը:

Մյուս որդի Մեսեքի անունը (եբրայերեն՝ Մեշեք, «թանկարժեք») Աստվածաշնչում հանդիպում է Ծննդոց 10:2-ում և Ա Մնացորդաց 1:5-ում: Եգեկիել 38:2-ում և 39:1-ում Մեսեքը հիշատակվում է Թորեյի հետ միասին՝ որպես Մագոզի իշխան, և համարվում է հաբեթյան ցեղից: Հովսեփոս Փլավիոսի կողմից Մեսեքը նույնացվում է կապադոկյան «մոսոցեթների» (մուշկի, որը նաև կապված է փռյուգիացիների կամ բրիգացիների հետ) և նրանց մայրաքաղաք Մագակայի հետ: Հիպոլիտոս Հռոմեացու տարեգրության մեջ (Ք. հ. 234) «իլիրացիները» նույնացվում են Մեսեքի սերունդներին: Բացի այդ՝ վրացիներն ունեն ավանդապատումներ, որոնց համաձայն՝ նրանք և այլ կովկասցի ժողովուրդներ, ինչպես հայերը, սերում են Մեսեքից (վրացերեն՝ Մեսիսեթի), Թորեյից և Թորգոմայից:

Հարեթի վերջին որդին Թիրասն էր: Նրա ցեղի աշխարհագրական տեղանքը երբեմն գիտնականների կողմից կապվում է թեր-չինների կամ Թիրասի հետ, որոնք ծովային ժողովուրդների՝ «թիրսեթների» (տիրեմացիների) խմբերից էին. ռազմածովային միություն, որը Ք. ա. 1200 թ. ահաբեկում էր Եգիպտոսին և միջերկրածովյան այլ երկրների: Այս ծովային ժողովուրդները Ռամզես III-ի արձանագրության մեջ անվանվում են «Տուրշա», իսկ Մերեմպտաիի սյան վրա՝ «Շովի Թերեշ»: Որոշ ուսումնասիրողներ Թիրասը կապում են Թրակիայի կամ Էտրուսկների հետ: 1838 թ. գերմանացի աստվածաբան Յոհան Քրիստիան Ֆրիդրիխ Տուխն առաջարկեց Տիրասը նույնացնել էտրուսկների հետ, որոնք, ըստ հունական և հռոմեական աղբյուրների, ինչպիսին է Հերոդոտոսը (I, 94), Լիդիայում ապրել են որպես տիրսեթներ՝ նախքան Ք. ա. 8-րդ դարում Իտալիա գաղթելը: Հովսեփոսը գրում է, որ Թիրասը եղել է «թիրասացիների» (թրակիացիների) նախնին, որը «կրակի մազերով» (կարմիր կամ շիկահեր) ժողովուրդ էր՝ ըստ Քսենոփանեսի («Հրեական հնախոսություններ», I, 6): 5-րդ դարի հայ պատմիչ Մովսես Խորենացին հայ ազգի հիմնադիր Հայկին ներկայացնում է որպես Թիրասի թոռան:

Այսպիսով՝ Նոյի որդի Հարեթը համարվում է հյուսիսային (Կովկաս, Փոքր Ասիայի հյուսիս, Սև ծովի շրջակայք) և արևմտյան (Եվրոպայի մեծ մասը) ժողովուրդների նախահայրը: Նրա սերունդները տարածվել են աշխարհագրական լայն տարածքներում՝ ձևավորելով բազմաթիվ ազգեր և մշակույթներ: Հարեթի տոհմը Աստվածաշնչում ներկայացվում է որպես մարդկության բազմազանության և ազգերի ձևավորման կարևոր հիմք: Այս ավանդությունը կարևոր տեղ է զբաղեցնում ժողովուրդների ծագման վերաբերյալ աստվածաշնչյան պատկերացումներում:

Նարեկ սրկ. ԳԱՄՊԱՐՅԱՆ
ՕՖեյս ԳԱՄՊԱՐՅԱՆ

Աստված ունի Բ ծրագիր

← էջ 3

Այսօր մենք տեսնում ենք քրիստոնեության հսկայական ան Աֆրիկայում և Ասիայի որոշ հատվածներում: Նրանք, ովքեր երբևէ «ընտրյալ» չեն համարվել, այսօր դառնում են Աստծո նոր Բ ծրագիրը, որը փոխարինում է սառած Ա ծրագիրը: Աստվածաշնչում միշտ գործում է «մնացորդի» սկզբունքը: Երբ ամբողջ ազգը շեղվում էր, Աստված պահում էր մի փոքր խումբ, որի միջոցով վերականգնում էր Իր ծրագիրը: Երբ Եղիա մարգարեն կարծում էր, թե ինքը միակն է մնացել, Աստված հայտնեց նրան գաղտնիքը. «Ինձ համար Իսրայելի մեջ յոթ հազար մարդ թողեցի, որոնց ծնկները չծալվեցին Բահաղի առաջ» (Գ Թագ. ԺԺ 18): Հայ ազգի փրկությունը և Բ ծրագրի մեջ մնալու միակ հույսը այն խորհրդանշական «յոթ հազարն» են, որոնք չեն գաղթանակվում ժամանակակից կուրդերով: Սա այն մնացորդն է, որը թույլ չի տալիս, որ Աստված վերջնականապես շրջվի ազգից: Մնացորդը պարզապես «փրկվածների խումբ» չէ, այլ այն թթխմորը, որը պետք է հունցի ամբողջ խմորը: Եթե մենք ուզում ենք, որ մեր ազգը մնա Աստծո ծրագրի մեջ, յուրաքանչյուր պետք է դառնանք այդ մնացորդի մի մասնիկը:

Ազգային պատասխանատվություն

Տաղանդների առակը: Աստվածաշնչյան այս առակն ուղղակիորեն առնչվում է այն հարցին, թե ինչու է Աստված փոխում Իր ընտրյալներին: Ընտրյալ լինելը ոչ թե «պարզև» է հանգստի համար, այլ «ներդրում»՝ աշխատանքի համար: Աստված հայ ազգին տվել է հսկայական «տաղանդներ»՝ հոգևոր ժառանգություն, սուրբ գրքեր, աշխարհում առաջինը լինելու պատիվը: Սա մեր Ա ծրագիրն է. «Մեկին տվեց հինգ տաղանդ, մյուսին՝ երկու, մյուսին էլ՝ մեկ՝ յուրաքանչյուրին ըստ իր կարողության» (Մատթ. ԻԵ 15): Եթե մենք որպես ազգ, մեր տաղանդը, որ է քրիստոնեական ինքնությունը, «թաղենք հողի մեջ»՝ վախենալով աշխարհիկ մարտահրավերներից կամ պարզապես ծովանալով, Տերը կզա և հաշվի կպահանջի: Բ ծրագիրը գործի է դրվում այնտեղ, որտեղ տաղանդը թաղված է: Տերը վերցնում է տաղանդն անպիտան ծառայից և տալիս նրան, ով աշխատում է: Սա խիստ նախազգուշացում է ընտրյալ լինելու փաստը կարող է խլվել և տրվել մեկ ուրիշին, ով պարտաւս է պտուղ տալ: Հայ ազգը պետք է հիշի, որ Աստված մեզ չի ընտրել, որ մենք լինենք «թանգարան», Նա մեզ ընտրել է, որ լինենք «աղ» և «լույս», իսկ եթե աղը համը կորցնի, այն պիտանի է միայն դուրս մետվելու և մարդկանց ոտքի տակ կոխան լինելու (Մատթ. Ե 13):

Շարունակելի

Հովհաննես սրկ. ԷԿԻՆՅԱՆ
Դիանա ՔՈՉԱՐՅԱՆ

ՔՐԻՍՏՈՆՅԱ ՅԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝
Մայր Աթոռ Սուրբ Էջմիածին

Հրատարակիչ՝
«Քրիստոնյա Հայաստան» թերթի խմբագրություն

Գլխավոր խմբագիր՝
Նարինե Հովհաննիսյան

Գրանցման վկայական՝ 624
Խմբագրության հասցեն՝
Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝ qristonyahayastan1@gmail.com
qristhay@etchmiadzin.am

web կայք՝
krishayas.wordpress.com
etchmiadzinlibrary.am/en/kristonya-hayastan

Ստոր. տպագր. 1.04.2026 թ.

Տպաքանակը՝ 1015